

ESPIRITUWAL NGA AMNESYA



Now I believe, now I believe,
All things are possible, now I believe;
Now I believe, now I believe,
All things are possible, now I believe.

2 Magpabilin kita sa pagtindog sa makadiyut lang karon para sa Pulong sa Ginoo. Moabli kita sa Amos, ang propeta Amos, sa ika-3 nga kapitulo, magsugod sa unang bersekulo.

3 Buot kong pasalamatan diay ang mga igsoong babayeng Juanita ug Anna Jeanne ug si Igsoong babayeng Moore, para niadtong maanindot nga koro sa mga alawiton. May nahinumduman hinoon ko niini, samtang nagalingkod ko dinha ug nagapaminaw niadto. Nahinumduman nako, kaniadtong kauban namo sila, nga nagaawit sa buluhaton, nag-istoryahanay kami ni Igsoong Jack, sila nga mga babaye nga dalagita pa kaniadto, mga dise-sais pa lang, mora'g ingon niana, batan-ong babaye pa. Karon, sa hunahuna ko, si Igsoong Anna Jeanne aduna na'y lima ka anak, ug si Igsoong Juanita pud adunay—adunay... inahan na sa duha ka bata. Ug haduol na gayud kita sa pagsalop sa adlaw, mga kababayen-an, kaysa kung unsa kita kaniadto, mga dise-sais ka tuig ang diperensya. Dili na magdugay, magalatas na kita, nianang mahimayaon nga panahon.

4 Karon sa Amos sa ika-3 nga kapitulo, atong basahon.

Pamatia kining pulong nga gipamulong sa GINOO batok kaninyo, Oh mga anak sa Israel, batok sa tibuok nga banay nga gikuha ko... gikan sa Egipto, nga nagaingon,

Kamo lamang nga akong giila... sa tanang mga kabanayan sa yuta: busa pagaduawon ko kamo tungod sa... inyong kasal-anan.

Magakakuyog ba ang duruha, gawas kon sila magakauyon?

Mongulob ba diay ang leon didto sa kalasangan, sa diha nga siya walay tukbonon? mongulob ba diay ang batan-ong leon diha sa iyang lungib, kung siya wala makasignit?

Malit-agan ba ang usa ka langgam, kung walay paon nga gibutang alang kaniya? moturok ba ang usa ka lit-ag sa yuta, ug unya wala gayud ing makuha gikan niini?

Sulod sa siyudad ang trumpeta patingogon ba alang sa gubat, ug ang katawohan dili diay mahadlok? mahulog

ba lamang ang kadautan sa usa ka siyudad, ug nga kini sa dili pagbuot sa GINOO?

Sa pagkamatuod ang Ginoo . . .dili magbuhat sa bisan unsa, gawas kon ang iyang mga tinago ginapadayag niya sa iyang mga alagad ang mga propeta.

Ang leon mingulob na, kinsa ba'y dili mahadlok? ang Ginoo . . .nagsulti na, kinsay makahimo nga dili motagna?

Iduko nato ang atong mga ulo.

⁵ Ginoong Jesus, hinaut nga kining, Imong Pulong, Ginoo, hinaut nga magkaaduna kami og pagpakig-fellowship palibot niini nga bahin karong gabhiona. Ginaampo namo, Ginoo, nga Imong ihatag kanamo ang konteksto para sa maong teksto, ingon nga magahisgot kami gikan dinhi, ug hinaut nga maghatud kini og kadungganan Kanimo. Panalangini kami samtang nagahulat kami, Ginoo, karong gabhiona, sa Imong Pulong. Ayoha ang mga may sakit ug ang mga nagaantus. Luwasa ang mga nahisalaag. Hatagi og kusog ang mga maluyahon, Ginoo, nga nagakaluya, sa pisikal ug sa espirituwal. Ug hatagi sab kami og usa ka dakung pagbubo sa Imong Presensiya, kay amo kining ginapangamuyo sa Ngalan ni Jesus. Amen.

⁶ Gusto kong hisgotan ingon nga usa ka teksto, gikan niini, karong gabhiona ang: *Espirituwal Nga Amnesia*.

⁷ Ayaw n'yo kalimti diay, ugma, may pagpang-ampo para sa mga may sakit ugma. Nagalaum kita nga ang Ginoo magabuhat og labing daku nga mga butang, ugma sa hapon sa alas dos, kon diin kita . . .sa diha nga sugdan na nato ang atong mga buluhaton. Moanhi ang akong anak para manghatag og mga prayer card. Ug igaampo ang tanan nga nagatinguha nga maiampo. Ug nagalaum gyud kita og mahimayaong kahigayonan, ugma, diha sa Ginoo.

⁸ Karon kamo nga mga ania karon, nga nagabisita gikan pa sa ubang lungsod. Hinumdumi n'yo, aduna pu'y maayo, nga mga iglesiang full Gospel sa tibuok siyudad. Ginadapit kamo sa tanan niana.

⁹ Bag-ohay lang kong nakig-istorya sa usa sa akong mga kaabag nga pastor, sa gawas, nga bag-o lang pud misulod, si Igsoong Jackson, nga kaniadto usa ka taga-Methodist nga iglesia, didto sa una o ikaduhang siyudad sa ubos nato.

¹⁰ Ug pila man ang ania dinhi nga may kahilambigitan sa tabernakulo, patan-aw sa inyong mga kamot, sa kon asa man. My, malipayon gayud—gayud ako nga nakaanhi kamo. Kini ang pinakaduol nga panagtigum nga akong naanhian sa Indiana sa dugay na nga panahon. Nagahunahuna gani ko nga mobalik, sa dili madugay, ug magtukod og usa ka tolda ug maghisgot bahin sa pito ka katapusang mga Trumpeta, kon itugot sa Ginoo.

11 Busa, karon, bueno hinumdumi n'yo ugma. Ayaw n'yo kalimti kini, ugma sa alas dos. Ug, bueno, magsugod diay ang atong sunod nga buluhaton sa sunod semana, didto sa Tampa, Florida.

12 Karon gusto kong maghisgot mahitugod sa: *Espirituwal Nga Amne- . . . Amnesia*.

13 Bueno, kining gamay nga tawo nga atong ginahisgotan, si Amos, sulod sa pipila ka minuto, mokuha sa tà sa atong basihanan sa dili pa kita moadto sa maong teksto. Panahon kini sa dakung pag-uswag kaniadto sa Samaria. Miuswag pud niadto ang Israel. Sila'y nanaggawi na uyon sa kalibutan ug miuswag.

14 Pero ang kauswagan dili kanunay mao'y ilhanan sa espirotuwal nga mga panalangin, apan usahay baliklad pa gani. Gahunahuna ang mga tawo nga siguro pagnakapanag-iyà ka na og daghang mga butang sa kalibutan, ug maipakita mo nga ginapanalanginan ka sa Dios. Dili kana tinuod. Tungod usahay baliklad kini.

15 Apan nakaplagan nato, siya, ngani wala kita'y nahibaloan kaayo mahitungod niining gamay nga tawo. Sa iyaha, wala kita'y kasaysayan, kung asa siya naggikan. Hinoon nahibaloan nato nga siya, sumala sa Kasulatan, usa siya ka magbalantay sa kahayopan, pero gipatungha siya sa Dios.

16 Akong mahanduraw nga makita, niadtong usa ka mainit nga adlaw didto sa Samaria, ang usa sa mga bantugan nga siyudad sa kalibutan nga ginaadtoan sa mga turista niadtong panahona. Nga mora og, ingnon lang nato, Miami, o—o Hollywood, Los Angeles, pipila ka lugar nga sama niana, usa ka bantugan nga dapit para sa mga turista. Ug mahanduraw gyud nato nga makita siya. Wala pa siya sukad nakaadto sa ingon niadto nga siyudad. Apan, anaa man kaniya ang Pulong sa Ginoo, mao nga miadto siya niining bantugan nga siyudad kon diin nagkatipunog na ang sala sa tanang bahin. Ang mga ministro kaniadto bugos nang mipahilayo sa Pulong sa Dios, ug sila walay propeta sulod sa dugay'ng mga katuigan.

17 Ug busa kining gamay'ng tawo, sa pagdangat niya didto ibabaw sa bungtod, nga mora'g sa amihanan lang sa Samaria, mahulagway ko nga makita siya, nagadan-ag niadto ang mainit nga adlaw, ug ang iyang ubanon na nga balbas diha sa iyang nawong, ug naningkit ang gagmay niyang mga mata, ug nagsinaw ang iyang gamay'ng, opaw nga ulo, samtang nagasudong siya didto niadtong siyudara. Ug naningkit ang iyang mga mata. Wala siya nagtan-aw sa kung unsa ang kasagarang makita sa mga turista, pag moadto sa usa ka siyudad ug makita ang tanan niining madanohon nga kaanyag. Kondili mitan-aw siya ug nakita kung unsa na nga talan-awon ang nahitabo niadtong siyudara, usa ka siyudad nga kaniadto mao ang siyudad sa

Dios, pero nahidangat na sa ingon niadto nga pagkadunot sa moralidad. Dili ikatingala . . .

¹⁸ Kining gamay'ng, wala-mailhi nga tawo mao si Amos nga propeta. Ug karon wala kaayo kita'y nahibaloan mahitungod sa iyaha. Wala tà mahibalo kung asa siya naggikan. Ang mga propeta kasagaran nagaabot man sa eksena, nga dili-mahibaloan, og nagahawa pud sa mao ra nga paagi. Wala tà mahibalo kung asa sila naggikan, kung asa sila paingon, wala gyud tà mahibalo sa ilang mga gigikanan. Basta na lang silang gipatungha sa Dios. Dili siya maayo kaayo og hitsura, apan anaa kaniya ang MAO KINI ANG GINAINGON SA GINOO. Mao kana ang pinakamahinungdanong butang nga akong nakita. Siyempre, miadto siya sa Samaria aron sugdan ang iyang buluhaton. Pero sigurado ko nga wala'y pagpakigtambayayong kaniya gikan kang kinsa man. Wala siya'y fellowship kard gikan sa unsa man nga denominasyon. Wala pud siya'y mga kredensiyal nga maipakita kung sa unsa nga pundok siya naggikan. Ug, apan, aduna siya'y usa ka butang, aduna siya og Pulong sa Ginoo alang niadtong siyudara.

¹⁹ Ug nahunahuna ko, kung mahimo natong dalhon si Amos, sa karon, nganhi sa atong panahon, abi-abihon ba kaha siya sa atong siyudad sa karon. Dawaton kaha nato siya, o buhaton kaha nato ang sama sa ilang gibuhay kaniadto. Ingon nga makita nato ang atong mga siyudad diha sa mao ra nga pagkadunot. Ug makita pud nato nga ang sala hilabihan na ka grabe diha sa taliwala sa mga tawo, sama sa kung unsa kini kaniadto. Ug nahunahuna nako, kung kining gamay'ng, tawo nga wala-mailhi, unsaon kaha niya pagsugod niini nga buluhaton? Unsaon, og asa kaha siya magsugod? Unsa nga iglesia kaha ang iyang adtoan, o kinsa kaha ang makigimbayayong sa iya? Ingon nga wala siya'y unsa man nga maipakita kung asa siya naggikan, wala gayud siya'y bisan unsa man lang gawas sa MAO KINI ANG GINAINGON SA GINOO alang sa maong siyudad.

²⁰ Nakaplagan niya sila nga ingon na ka dunot ug ingon na kaus-us ang moralidad, makuyaw kadto nga panahon. Ang mga kababayen-an niadto nga siyudad nahimong halos sama ra kanila dinhi sa Estados Unidos. Nahimo na silang imoral. Tanan nga gilauman sa Dios kanila, mipaingon hinoon sila sa lahi nga direksyon. Ug—ug hingsayran nato nga usa kadto ka grabe nga dapat kon diin aduna sila kaniadto og mga pagsayaw-sayaw sa dalan, ang mga kababayen-an malaw-ay gayud nga ginahubo na ang ilang mga bisti, ug kung unsa na lang, nga sama sa pasundayag nga paghubo-hubo. Sa tinuod lang, usa pa kadto ka pangpubliko nga kalingawan niadtong mga panahona, pero karon adlaw-adlaw na gyud kini. Moinit lang ang panahon, ug dili n'yo na kinahanglan nga moadto pa sa unsa man nga pasundayag. Silang tanan anaa na man sa kadalanan, sa bisan asa, na lang. Makauulaw kamong mga kababayen-an, nga

buhaton ang ingon-nianang butang! Wala ba kamo naulaw sa inyong kaugalingon?

²¹ Ug unya—ug unya gisulti ko kana sa usa ka babaye dinhi, dili pa lang dugay, ug ingon siya, “Aba,” ingon siya, “Igsoong Branham,” miingon, “kana, kana’y—sama lang man kana sa uban pa nga mga kababayan-an.”

²² Ingon ko, “Pero dili man kita angay’ng manglihok nga sama sa tanang uban pa nga mga tawo. Lahi man kita. Lahi ang—ang atong kinaiyahan.”

²³ Nakahinumtum hinoon ko sa usa pud ka babaye, nga miingon, “Bueno, Igsoong Branham,” miingon ang usa pa, “ako—ako—wala man ko nagasul-ob og purol.” Miingon, “Karsones ang akong ginasul-ob.”

²⁴ Ingon ko, “Mas samot kana.” Uh! “Ang ingon sa Dios, ‘Usa ka dulumtanan kana,’ sa Iyang atubangan, ‘para sa usa ka babaye nga magsul-ob og bisti nga iya sa lalaki.’” Tinuod gayud kana.

May usa pud nga miingon, “Bueno, wala na man gud sila nagahimo og uban pa nga mga bisti.”

“Pero nagahimo pa man sila sa gihapon og mga makinang igpanahi ug aduna pu’y mga tela.”

²⁵ Wala na gyu’y angay’ng ikarason. Kana’y sa kung unsa gayud ang anaa sa kasingkasing. Mao nga ingon niana ang ginapakita sa gawas. Kini—ginapaila niini ang kaugalingon niini.

²⁶ Ug karon nasayran nato, kini nga siyudad, nahimong dunot na gayud ang moralidad niini. Nahadlok ang mga magwawali nga mosulti og unsa man mahitungod niini. Ug, apan aduna sila’y usa ka gamay, kining gamay’ng tigulang nga lalaki nga nagatungas sa bungtod, nagapaingon na aron isulti kanila ang MAO KINI ANG GINAINGON SA GINOO, “Hinloi kini nga butang, kay kon dili nan mopaingon kamo sa pagkabihag.” Ug nabuhi mismo siya nga nakita ang panahon sa katumanan sa iyang propesiya. Nagpropesiya siya niadtong mga panahon ni Jeroboam nga Ikaduha, ingon nga usa ka sinalikway, sa gihapon; siya—midapig siya sa ubang mga nasud. Ug—ug nagpropesiya kining gamay’ng si Amos ug nagsulti kanila, ingon niya, “Ang mismong Dios nga ginapamahayag ninyo nga inyong ginaalagaran, Siya mao’y magalaglag kaninyo.” Ug gibuhay gayud sa Dios.

²⁷ Ug kung madungog pa dinhi ang iyang tingog karong gabhiona, sa...sa Birmingham, mao ra gihapon ang iyang igapamahayag ngadto sa mga kaiglesiahan. “Ang mismong Dios nga ginaangkon ninyo nga inyong gialagaran, mao mismo’y magalaglag kaninyo sa umalabot nga adlaw.” Wala ako nagapamulong nga dinhi ra sa niining mga mananambong dinhi. Kini nga mga teyp nagakadangat man sa tibuok kalibutan. Karon, hinumdumi n’yo, tinuod kana.

28 Dayon nakaplagn niya, sa pag-abot niya ngadto sa maong siyudad, nga iyang . . . tanan niini nga mga butang, nahunahuna ko kung unsa kaha ang iyang gibati sa pagtan-aw ug pagkakita niadtong pagkaimoral sa mga tawo sa Dios, kang kinsa gikapadala siya.

29 Dawaton kaha nato siya karon? Kung moanhi siya, kita—makigtimbayayong kaha kita sa iyaha? Ihatag kaha nato sa iyaha ang atong—atong pinakamaayo? Ihatag kaha nato sa iyaha ang atong pagtagad? Managhinulsol kaha kita kung iya kitang sultihan nga kinahanglan natong mobalik na sa Pulong sa Ginoo ug buhaton kung unsa mismo ang gisulti sa Ginoo nga pagabuhaton?

30 Unsa kaha'y buhaton sa atong mga igsoong babaye sa ilang pinutlan nga buhok? Pataason kaha nila pag-usab ang ilang buhok, kung moanhi si Amos? Iwali niya mismo kana, ug ginasulti ko kana kaninyo, tungod kay mao kana ang Pulong sa Ginoo.

31 Ako—nahunahuna ko ang atong—ang atong mga hunta nga nagapili og mga diyakono, nga naminyo na sa makatulo o makaupat ka higayon, ug—ug uban pa nga ingon niana, ug gapaninguha pa nga mahimong mga diyakono, nahunahuna ko ang tanan niining mga butanga, unsa kaha'y buhaton ni Amos sa lalaki nga tugotan ra ang iyang asawa nga magsul-ob og purol ug mogawas dinha sa dalan, ug manghagbas og sagbot, diha sa nataran, sa diha nga may lalaki nga nagaagi? Unsa kaha'y isulti niya sa ingon niana nga lalaki?

32 Sigurado gayud nga kondenahon niya kana uban sa tanan-tanan nga anaa kaniya, tungod anaa man kaniya ang MAO KINI ANG GINAINGON SA GINOO, ug wala na siya'y unsa pa man nga mahimo gawas niana. Nakaplagn niya sila niadtong panahona nga may usa ka grabe nga sakit, espirituwal nga amnesia, ug eksaktong ingon niana usab ang anaa kanato sa karon.

33 Bueno, giunsa man niya pagkahibalo kung unsay mahitabo? Unsaon man pagkahibalo ni Amos? Una, usa siya ka propeta. Ug, ang sunod nga butang, hingsayran niya basi sa sakit kung unsa ang sintomas, ug mahibaloan na niya kung unsa ang mamahimong mga resulta.

34 Ngani kung susihon sa usa ka doktor ang usa ka bukol ug makita nga nakagamut na kana nga bukol, mahibaloan na niya nga wala na'y nahibilin pa gawas sa kamatayon. Mao na lang kana, gawas kon adunay buhaton ang Dios para niana.

35 Bueno, kon motan-aw kamo sa usa ka siyudad, ug motan-aw kamo sa mga tawo, motan-aw kamo sa usa ka iglesia, ug motan-aw mo sa mga tawo nga napahilayo na kaayo sa Dios, wala na gyu'y unsa man nga mahiling kondili, "Sala! 'Ug ang bayad sa sala mao ang kamatayon.' Naghimalatyon na kini."

Ang panghiling ang nagapamatuod kung unsa kini. Nakita n'yo, pag mopahilayo na gani ang mga tawo gikan sa Dios ug ayaw nang manalinghug sa Pulong, wala na'y pagtinguha para sa Pulong, kung ingon-ana aduna la'y usa ka pagsusi para niana, "‘Ang kalag nga nagakasala, kana nga kalag mamatay.’ Ang dili-pagtoo ang magapahimulag kaninyo gikan sa Dios." Tinuod gayud kana.

³⁶ Mao nga, nahibaloan niya kung unsa ang sakit, kung unsa ang mga resulta, sa dihang nakita niya ang sakit sa—sa sala sa maong siyudad.

³⁷ Bueno, kining amnesya, gikasultihan kita nga kini'y usa—usa—usa ka . . . maghinungdan kaninyo nga mamaanaa sa usa ka kahintang kon diin dili na ninyo maila ang inyong kaugalingon. Bueno, talagsaon kini nga butang. Tungod dili man kini pirming mahitabo, pero ang hinungdan niini mao'y gumikan sa pagkahadlok. Usa ka tawo nga dili na makaila kung si kinsa sila. Makaplagan n'yo kini sa mga gubat, usahay, makasinati niini ang mga sundalo. Usahay makasinati niini ang mga tawo. Ang usa pa ka butang nga nagapahinungdan niini, mao ang pagkabalaka. Magpahinungdan sàb niini ang pagkabalaka.

³⁸ Pero ang pagkabalaka walay maayong ikahatag, man lang. Oo, mao nga isalikway gayud—gayud—gayud ninyo ang pagkabalaka, ug dawata n'yo ang pagtoo.

³⁹ Adunay miingon, "Bueno, karon, unsa kaha kung patyon ka na inig ka buntag, dili ka ba diay mabalaka?"

Ingon ko, "Dili, sa tan-aw ko dili."

"Ngano man?"

Ingon ko, "Wala ma'y maayo nga mahatag ang pagkabalaka kondili magpagrabe lang hinoon kanako."

"Bueno, unsa man pu'y kaayohan nga mahatag kung aduna ka'y pagtoo?"

Ingon ko, "Mahimo akong luwason niini." Ug husto kana, kita n'yo.

⁴⁰ Busa ang pagkabalaka wala gyu'y maayo nga mahatag, man lang, apan mahatag sa pagtoo ang tanan nga maayo. Tumoo kamo!

Bueno ang pagkabalaka ang nagapahinungdan niini usahay.

⁴¹ Ug ang usa pa ka butang nga nagapahinungdan niini diha sa mga tawo, mao ang magpataliwala sa duha ka opinyon. Maghinungdan kana og amnesya. Ug dalhon ka niini sa kahintang kon diin ikaw—ikaw, sa tinuod lang, ang mahitabo kanimo, mawala ka na sa imong mga panabot. Mawala ka na sa husto mong pangisip. Dili ka na makahimo. . . Wala ka na masayod kung kinsa ka. Dili na nimo maila ang imong kaugalingon. Makalakaw-lakaw ka man, makakaon ug

tanan na, pero, ikaw, dili nimo sa gihapon maila ang imong kaugalingon. Aduna ka man og hataas nga edukasyon, mahimo mong... mao gihapon ang edukasyon nga imong naangkong, apan wala ka na masayod kung asa kana gikan, wala ka na masayod kung kinsa ka, og kung asa ka nahisakop. Ingon-ana ang amnesia, sa gikaingon kanato.

⁴² Maila kita pinaagi sa atong mga pamilya, sa niini nga kinabuhi sa tawo, pinaagi sa kaminyoon. Ug sa atong mga asawa, naminyo kita, ug maila ang atong pamilya pinaagi sa panaghiusa sa atong—atong—atong kaminyoon. Ug dayon, ang hunahunaon, nga unsa kaha kung mahitabo kaninyo kining makahahadlok nga butang ug dili na ninyo mahimong mahinumduman kung kinsa ang inyong giminyoan, kung kinsa ang inyong asawa, kung kinsa ang inyong mga anak, kung kinsa ang inyong amahan ug inahan, kung kinsa ang inyong silingan? Mamahimo nga usa—usa gyud kana ka makahahadlok nga butang.

⁴³ Dayon maila kita, usab, maila ang atong mga kaugalingon diha sa kaliwatan sa tawo, tungod sa pagkaaduna nato og kaalam ug—ug pagkahimong lahi kay sa mga mananap. Ang mananap dili man makahunahuna, nagakinabuhi lamang kini pinaagi sa mga tingog. Walay kalag ang mananap. Ug, hinoon, mga mananap man kita. Ang nakapalahi kanato... Usa kita ka mammal, pero ang... Kanang mammal mao'y usa ka mananap nga mainit ang temperatura sa lawas, ug anaa kita sa kinaiyahan sa mananap. Pero ang nakapalahi kanato, maila kita pinaagi sa pagkaaduna og kalag, usa ka konsensiya nga nagasulti kanato kung unsa ang matarung ug dautan.

⁴⁴ Bueno may usa ka kahimtang, nga pag magkaaduna ka niining amnesia, mamahimo ka nga sama ni Nabucodonosor, kaniadto, nga usa niana ka higayon gipataas ang iyang kaugalingon, ug gipatoo siya sa Dios nga usa siya ka hayop. Ug mipuyo siya sa kamingawan ug—ug mikaon og sagbot nga sama sa usa ka baka. Ug—ug ang iyang—iyang mga balhibo nanag-as na gud sa iyang lawas, nga mora og mga balhibo sa agila, ug nagkaaduna siya og kasingkasing nga iya sa usa ka mananap. Kita n'yo? Amnesia kadto, tungod kay nahikalimtan na man niya nga usa siya ka hari. Nahikalimtan na niya nga usa siya ka tawo. Ug abi niya nga usa siya ka hayop, mao nga nanglihok pud siya nga mora'g usa ka hayop, tungod kay nahikalimtan na man niya nga usa siya ka tawo.

⁴⁵ Pero masayon ra kaayo, sa karong panahon. Ug mahikalimtan nato, usahay, kung unsa ba gayud ang Iglesiang Cristohanon. Nagapanglihok kita nga sama sa kalibutan. Nagapakita kana nga aduna kita'y espirituwal nga amnesia, tungod kay dili man kamo nagapanglihok nga sama sa Cristohanon. Nanglihok hinoon kamo nga sama sa kalibutan. Gidawat n'yo ang kasingkasing nga iya sa kalibutan, ug kana mao'y nagapahinungdan niini.

⁴⁶ Dinhi atong—atong nahibaloan usab nga ang Israel kaniadto nakighilambigit, nakighilambigit sa kalibutan, ug nahulog sa niini nga pagkadunot. Ug gipadala kini nga propeta aron hawason sila gikan niini, kung mahimo niya, ug aron sultihan sila. Ang Dios, pinaagi sa Iyang grasya, gipili ang Israel gikan sa tanang uban pa nga mga pamilya sa ibabaw sa yuta. Grasya ang nagbuhat niadto. Gihatag Niya kanila ang pinili nga kayutaan. Gihatagan Niya sila og mga balay nga dili na nila kinahanglan pang tukoron. Ang Dios ang nagbuhat niadto, ang nagpili kanila. Gihatagan Niya sila og mga umahan nga wala nila gipalit. Iyang—Iyang gihatagan sila, gihatagan Niya sila og pagkaon nga wala nila gitanum. Gihatagan Niya sila og mga atabay nga wala nila gikalot. Gihatagan Niya sila og mga kadaugan nga wala nila gidaug. Gihatagan Niya sila og grasya nga wala sila’y gihimo para mamahimong takus. Ang Dios mismo ang nagbuhat niadto pinaagi sa Iyang grasya alang niini nga katawohan, ang Israel, nga Iyang pinili, og Iyang hinigugma.

⁴⁷ Ug miingon Siya, diha sa Biblia, “Iyang nakaplagan siya sa umahan, sama sa usa ka batang babaye nga naglungang sa kaugalingon niyang dugo, ug Iyang gihugasan siya ug gilimpyohan siya, ug kung unsa pa man nga Iyang gibuhhat. Apan human nga gipakita sa Dios ang tanan niini nga mga kalooy ngadto kaniya, ug nahimo siya nga dato,” nagkaaduna siya og amnesia, amnesia, “ug nahikalimtan na niya ang tanan mahitungod sa kon diin kining mga butanga naggikan.”

⁴⁸ Sa hunahuna ko ingon-ana sàb ang hulagway sa U.S.A., 1964. Nagaantus kini sa mao gihapon nga balatian. Kita mao ang halangdon og gamhanan nga mga iglesia. Kita mao ang halangdon, gamhanan nga katawohan. Minilyon ang atong gidaghanon, ug nahikalimtan na nato kon diin kining mga butanga naggikan.

⁴⁹ Aduna sila kaniadto og grabe nga kaso sa maong balatian. Human nga nahimong maayo ang Dios ngadto kanila, ug gikuha sila gikan sa tanang mga paganong kayutaan, ug gihimo silang usa ka gipahimulag nga katawohan, gilain sila alang sa Iyang Kaugalingon. Ang ingon Niya, “Siya mikuha og usa ka punoan gikan sa ubang nasud ug gitanum kini didto sa ubang nasud, ug Iya gayud kining gipahimutang aron mamunga kini ug magmabungahon, apan nahikalimtan sa punoan kon asa nagagikan ang mga panalangin niini.”

⁵⁰ Mao man usab ang katawohan sa Dios, sa niining kaulahiing mga adlaw, nahikalimot na kung unsa ang kahulogan sa testimonyo sa pagkahimong usa ka Cristohanon. Tungod na usab, niining amnesia nga mitakboy sa mga tawo. Mao nga dili na nila maila ang ilang mga kaugalingon.

⁵¹ Sila, nahikalimtan na nila ang tanan mahitungod Niini. Nahikalimtan na nila ang Iyang pagkabalaan. Nahikalimtan na

nila ang Iyang kasugoan. Ang mga babaye nagakinabuhi na nga sama sa tanang uban pa nga mga kababayen-an.

⁵² Ang Iglesia sa Dios ug ang Iyang mga tawo kanunay na mang, “Usa ka linain nga katawohan, usa—usa ka tinawag-pagawas nga katawohan, usa ka talagsaon nga katawohan, usa ka balaang nasud, usa ka harianong pagka-sacerdote; nga nagahalad og espirituhanong mga halad ngadto sa Dios, ang mga bunga sa ilang mga ngabil, nanagdayeg sa Iyang Ngalan.” Gitawag sa Dios ang Iyang Iglesia ug gipahimulag Kini gikan sa kalibutan, alang niana mismo nga katuyoan. Ug gihatagan Niya kini og kasugoan, ug Siya, Kini, angay gayud nga mamahimong balaan. Miingon man Siya, “Ako balaan, ug kamo kinahanglan nga mamahimong balaan, ug kung wala ang pagkabalaan walay bisan kinsa nga makakita sa Ginoo.” Gisulti kana sa Dios, Mismo.

⁵³ Ug gitawag Niya kini nga katawohan aron mamahimong ingon niini nga matang sa katawohan, apan nahikalimtan na nila ang mahitungod niini. Nahikalimtan na nila ang Iyang mga kasugoan, ug nahikalimtan na nila ang ilang moralidad. Ang mga kababayen-an didto sa kadalanan, ang Israelinhon nga mga kababayen-an kaniadto, ang matag usa kanila nagalaum nga—nga magsamkon pinaagi sa Balaang Espiritu, aron ihimugso ang Mesias, ug unya nanglihok nga ingon niadto. Mangil-ad na ang ilang taras.

⁵⁴ Gusto kong mohunong sa dinhi sa makadiyut, aron isulti nga mao gihapon kini sa taliwala sa atong mga katawohan, sa karon, nga nagapatawag sa ilang mga kaugalingon nga mga Cristohanon. Ang ilang taras, kung maamgo lang gyud unta ninyo!

⁵⁵ Usa niana ka higayon, didto sa Habagatan. Nakabasa ko og usa ka sugilanon gikan didto, diin kaniadtong aduna pa sila og mga ulipon. Ginakuha nila kadto nga mga tawo ug ipangbaligya sila sa merkado, sama lang nga nagabaligya ka og usa ka ginamit na nga sakyanan. Ug unya dunay usa ka mamalitay, ahente, nga nagaadto ug ginakuha kadto nga mga ulipon ug ginabaligya sila, ug sama lang nga nagabaligya ka og usa ka sakyanan o unsa man.

⁵⁶ Ug halayo kadto nga mga ulipon gikan sa kaugalingon nilang nasud. Taga Africa man sila. Gipangbihag sila sa mga Boer, gidala sila ngadto sa mga isla, ug pagkahuman ilegal sila nga gipasulod nganhi sa Estados Unidos ug gipangbaligya sila ingon nga mga ulipon, gikan didto sa Jamaica ug sa palibot nga lugar.

⁵⁷ Bueno masayran nato nga masulob-on gyud kadto nga mga tawo. Ingon nga gipangbihag man sila gikan sa kaugalingon nilang yutang-natawhan. Gipangdakup sila sa kaaway, ug mao nga masulob-on sila. Dili na gayud nila makita pa ang ilang bana, o ang ilang asawa, ang ilang amahan ug inahan, og ang

ilang mga anak. Sila'y bug-os gayud. . . Gikinahanglan nilang lapdusan sila, gamit ang mga latigo, para motrabaho sila, tungod kay nagmasulob-on man sila.

⁵⁸ Ug usa niana ka adlaw, may usa ka ahente nga miadto sa usa ka plantasyon, og nakita niya ang usa ka pundok sa mga ulipon nga nanagtrabaho didto. Ug siya—misulod siya ug gipangutana ang tag-iya, miingon, “Unsa man ka daghan ang imong mga ulipon?”

Mitubag, “Mga usa ka gatus.”

Miingon, “Aduna ka ba'y ibaylo o kaha ibaligya?”

Ingon ang tag-iya, “Oo.”

Miingon, “Patan-awa sa ko sa ilaha.”

⁵⁹ Ug miadto siya sa may umahan ug gitan-aw sila, ug nakita niya nga kinahanglan pa nilang lapdusan sila. Ug pagkataudtaud, nakita niya ang usa ka batan-ong lalaki nga dili na nila kinahanglan pang lapdusan. Pinabugdo ang iyang dughan ug nakataas ang iyang suwang; og dili na siya kinahanglan pang lapdusan. Busa miingon ang ahente, “Gusto kong paliton kana nga ulipon.”

Ug miingon ang tag-iya, “Pero dili siya ginabaligya.”

⁶⁰ Miingon ang ahente, “Bueno, unsa ma'y kalainan niana nga ulipon?” Ingon pa, “Kana ba nga ulipon ang agalon sa tanang uban pa kanila?”

Miingon ang tag-iya, “Dili, ulipon lang pud siya.”

Miingon ang ahente, “Bueno, tingali'g lahi ang imong ginapakaon sa iyaha.”

Miingon ang tag-iya, “Dili, nagakaon man siya didto sa kusina kauban ang uban pa nga mga ulipon.”

⁶¹ Ingon siya, “Bueno, unsa man gyu'y nakapalahi kaniya kay sa tanang uban pa nga mga ulipon?”

⁶² Ingon niya, “Bueno, nahibulong pud ko, niini, sa dugay na nga panahon. Pero usa niana ka adlaw akong nahibaloan, nga, didto diay sa ilang yutang-natawhan kon diin siya naggikan, ang iyang amahan mao ang hari sa tibuok tribu. Ug bisan pa usa ra siya ka langyaw, ug halayo sa iyang lugar, nakahibalo siya sa gihapon nga anak siya sa usa ka hari, ug siya—nagagawi gihapon siya ingon nga anak gayud sa usa ka hari.”

⁶³ Nahunahuna ko, “Pero, kana, kung ang usa ka Negro nga gikan sa Africa, nasayod nga sakop sa usa ka tribu ang iyang amahan ug usa ka hari sa usa ka tribu, unsa pa kaha ang angay'ng buhaton unta sa usa ka Cristohanon nga natawo na pag-usab, usa ka lalaki o usa ka babaye, ingon nga ang atong Amahan mao ang Hari sa Langit sa Himaya!” Angay gayud kita managgawi ingon nga Cristohanong mga kalalaken-an ug mga kababayen-an. Manglihok kita nga sama niini, mangbisti nga

sama niini, manulti nga sama niini, magkinabuhi nga sama niini. Bisan pa usa ra kita ka lumalangyaw, pero mga anak man kita sa Hari. Amen.

⁶⁴ Pero ang atong taras, ang pag-ubos sa atong moralidad sa mga adlaw nga atong gikinabuhian karon! Nahulog kaniadto ang Israel sa mao gihapong naandan na nga pagkadunot ug nahimong imoral usab. Nahikalimtan na nila ang mga kasugoan sa Dios, “Dili ka manapaw, ug dili ka maibog sa asawa sa imong silingan,” ug uban pa. Nahikalimtan na nila ang maong mga kasugoan. Ayaw na nila—nila—nila niadto. Ug ilang—gitinguha na nila nga—nga mamahimong sama sa tanang uban pa sa kalibutan, sama lang sa nahitabo sa iglesia sa karong panahon.

⁶⁵ Usa niana ka higayon, ang Israel, niadtong misugod na silang, nagtinguha nga magkaaduna og usa ka hari para mao’y mangulo. Gisultihan sila ni Samuel, ang propeta nga gipadala ngadto kanila, miingon siya, “Karon aduna ba ko’y gisulti kaninyo sukad og bisan unsang butang diha sa Ngalan sa Ginoo nga wala mahitabo?”

Mitubag sila, “Wala, wala pa.”

⁶⁶ “Nanglimos ba ako kaninyo para sa akong pagkaon ug salapi, sa inyong salapi, usab, para ako mabuhi?”

⁶⁷ “Wala, wala mo gibuhat kana. Wala ka pa’y gisulti kanamo og bisan unsang butang, Samuel, kondili kung unsa lamang ang nahitabo. Ug wala sàb ka sukad nangayo kanamo og salapi, para sa imong panginabuhi. Apan, bisan pa man, gusto namo og hari, sa gihapon.”

⁶⁸ Miingon ang Dios kang Samuel, “Pasagdi sila nga magkaaduna niana. Dili man ikaw ang ilang gibalibaran; Ako ang gibalibaran nila.”

⁶⁹ Misangpot ang Israel sa mao gihapon nga kahimtang kaniadto. Ayaw na nila og mga propeta sa Dios. Wala na sila magkinahanglan kanila. Ug kung may usa nga moabot, ug maghatud kanila og Pulong, ug paningkamotan nga ipabalik sila sa Pulong, ila ra Kining isalikway. Ginabuhat nila kana sa kanunay, sa ingon-ana nga paagi sa pagkadunot.

⁷⁰ Sa diha nga maghiusa ang kalibutan ug ang iglesia, nan ayaw na nila og unsa mang butang nga espirituwal. Dili nila gusto ang MAO KINI ANG GINAINGON SA GINOO. Ang gusto nila mao’y kung unsa ang ginatinguha nila. Gusto nila ang kalibutan, ug moingon pa nga usa sila ka Cristohanon; pero nagakinabuhi sa kalibutan, ug nagakinabuhi uban sa kalibutan, ug nagakinabuhi nga sama sa kalibutan, ug ginapapabilin sa gihapon ang ilang pagpamahayag ingon nga usa ka Cristohanon. Kabalo mo, ang hinungdan man gud niini, tungod kini sa espirituwal nga amnesia. Eksaktong mao gyud kini. Wala na sila kahibalo kung kinsa sila. Nahikalimtan na nila kung unsa gyud unta ang angay nilang buhaton.

⁷¹ Kung dunay usa nga moabot karon, nga sama niadto, mahimong isalikway gihapon kini. Aduna sila kaniadto og grabe nga kaso niini, ug mao usab sila karon. Dili nila mahilambigit ang ilang mga kaugalingon sa supernatural nga mga butang, dili na, tungod kay dili man nila gusto kini. Ang Pulong, ang Ebanghelyo, ayaw nila Niini. Miabot kanila ang sala nga sakit, ug gusto pud nila kana.

⁷² Makapahimuot ang sala para sa dili-nakabig nga kasingkasing. Maayo kining tan-awon para sa dili-nakabig nga hunahuna, pero kini mao'y dalan ngadto sa kamatayon. Wala na'y nahibilin pa gawas sa kamatayon. "Ang bayad sa sala mao ang kamatayon," ug sigurado gayud nga anihon ninyo ang maong mga bayad. Nagpugas kamo sa mga hangin, ug karon ginaani na ang alimpulos.

⁷³ Ang espirituwal nga mga ilhanan ug ang pagwali sa usa ka ordinado nga mensaherong gikan sa Dios, wala na gayud nakapapukaw kanila. Ang mga kababayan-an mokatawa ra mismo sa ilang atubangan, ug moingon, "Dili ko na kinahanglan nga maminaw sa ingon-anang butang." Ambot kung wala ba kaha kana nahitabo na pag-usab! Unsa man kana? Espirituwal nga amnesia, eksakto gyud kini. Nahikalimtan na nila nga ang Dios ug ang Iyang Pulong usa ra, ug dili Niya mahimong usabon Kini.

⁷⁴ Kung may usa ka propeta nga mitungha niadtong mga panahona ug naghatag og usa ka espirituwal nga ilhanan, usa ka espirituwal nga tingog, ug gihatag ang tingog sa Dios nga nagpaluyo niini, kataw-an lang nila Kini ug biaybiayan Kini.

⁷⁵ Kabalo na mo sa karaang panultihon, "Ang mga buangbuang nga nagsul-ob og sapatos nga may espayik nga lansang ang magalakaw sa lugar diin mahadlok gani ang mga Manulonda sa pagtunob." Ingon niana ang ginabuhat niining espirituwal nga amnesia. Ginapadangat niini ang mga tawo sa punto kon diin wala na sila og pagbati sa kinasuloran nila. Ayaw na nila sa unsa man nga espirituwal.

⁷⁶ Ipananglitan ta na lang ang usa ka tinuod nga espirituwal nga panagtigum, kon diin ginapang-ayo sa Balaang Espiritu ang mga may sakit ug ginaila ang mga hunahuna nga anaa sa kasingkasing, ug ipahayag kini sa taliwala sa tanang kasimbahanan, nga sa usa ka dakung panagtigum sa ingon-ani nga estadyum, ug tan-awa n'yo kung unsa ang mahitabo. Sa pipila ka minuto, manindog na ang tanan ug manglakaw. Wala sila'y unsa man nga kahilambigitan niini. Ayaw nilang magkaaduna og unsa man nga kahilambigitan niini. Maminaw pa hinoon sila sa usa ka intelektuwal nga pamulong.

⁷⁷ Apan paghisgotan na ang Gahum ni Jesus Cristo, ug ang Iyang pagkabanhaw, ug ang ang Espiritu Santo, nan ayaw nilang magkaaduna og unsa man nga kahilambigitan Niini, tungod

kay ginakondena man sila niini. Ginasunog sila sa butang nga angay nilang mahibaloan. Hinoon, wala ma'y pagpanton, nga makalipay sa panahon. Apan, kini, kung magpailalum ka niini, kini—magahatud kini og mga bunga sa paghinulsol. Busa nahibaloan nato, nga kon matakboyan na niining espirituwal nga amnesya ang mga tawo, kung ingon-ana sila'y—anaa gyud sila sa dili maayo nga kahintang. Ngani karon makita man nato ang mao gihapong butang. Karon gusto ko nga . . .

⁷⁸ Kinahanglan gyud kamong maila. Sa kon asa man, kinahanglan kamong makita. Ginapakita sa inyong kinabuhi, karong gabhiona, kung asa kamo maila. Mahimong maila kamo diha kang Cristo o kaha gawas kang Cristo. Dili kamo ingon nga tunga-tunga ra. Wala ma'y ingon nianang butang nga sama sa palahubog nga buotang tawo. Walay itum nga puti nga langgam. Mahimong luwas kamo o kaha dili kamo luwas. Mahimong usa ikaw ka balaan o kaha usa ka makasasala, usa ba kaha ka makasasala o kaha usa ka balaan, ug ang inyong espirituwal nga pagtagad sa Pulong sa Dios ang mismong nagapaila kaninyo kung asa gyud kamo nagabarug. Husto!

⁷⁹ Ang Pulong sa Dios, nagpanghimatuod, og nagpamatuod na nga ang bautismo sa Espiritu Santo mao sa gihapon sa kung unsa kini kaniadtong Adlaw sa Pentecostes o sa ubang panahon. Ug si Jesus Cristo mao sa gihapon kagahapon, karon, ug hangtud sa kahangturan. Ug ang inyong pagtagad Niana ang nagapaila kung aduna ba kamo'y espirituwal nga amnesya, o wala. Husto kana. Bisan pa kung ikaw usa ka diyakono, o bisan pa kung ikaw usa ka magwawali, wala kini'y . . . Oo, matakboyan sila niini, usab. Busa atong nahibaloan, nga makatakod kini ug motakboy sa tibuok butang. Karon matikdan nato.

⁸⁰ Bueno, para mahimong usa ka Amerikano. Para mahimong Amerikano, kinahanglan kong maila kauban sa akong nasud. Karon paminaw mo og ayo. Ingon nga usa ka Amerikano, sa dihang natawo ako dinhi niining nasura, nahimo akong usa ka lungsoranon, ug naila ako kauban niini nga nasud. Ang tanan kung unsa kini karon, mao ako. Ang tanan kung unsa kini kaniadto, mao ako. Kay naila man ako ingon nga usa ka Amerikano, kung ingon-ana kinahanglan kong dalhon ang tanang kaulawan niini, og tanang dungog niini. Kung unsa man kini, mao sàb ako, ingon nga naila ako kauban niini. Amen. Gusto kong masabtan ninyo kini. Naila ako ingon nga usa ka lungsoranon sa Amerika, kung ingon-ana ang tanan kung unsa kini kaniadto, mao ako. Ang tanan kung unsa kini karon, mao ako. Siguradong kabahin ako niini. Kinahanglan kong . . . kung usa ako ka lungsoranon sa Amerika, kabahin ako sa Amerika. Ug ang tanan kung unsa kini, mao sàb ako.

⁸¹ Dili ko gayud kini angay'ng hikalimtan. Kung gusto kong magpabilin nga usa ka tinuod nga lungsoranon sa Amerika, angay kong timan-an nga ako mao gayud kung unsa ang

akong nasud, ingon nga naila ako kauban sa akong nasud. Ang hikalimtan siya, o—o... Ang makig-away para kaniya, o ang mamatay para kaniya, o ang mobarug para sa tanan nga iyang gibarugan, angay gayud akong mobarug para niini. Kung unsa ang akong nasud, mao sàb ako. Kung unsa ang ginabarugan niini, mobarug pud ako para niini. Para mahimong usa ka maunongon nga Amerikano, andam gyud kong mamatay para niini, makig-away para niini, mobarug para niini, og buhaton ang bisan unsa man. Ingon nga kabahin ako niini. Dili mo kini mahimong sawayon nga dili ako ginasaway. Pag mosulti ka og usa ka butang batok niini, ginasulti mo usab kini batok kanako, ingon nga usa man ako ka Amerikano. Ang isulti kini batok kanimo, ingon nga Amerikano, ug kung unsa ma'y isulti nila batok niini nga nasud, ginasulti pud nila batok kanimo, ingon nga kabahin ka man niini. Ayaw gyud ninyo kalimti kana; pag mahikalimtan gani ninyo, kung ingon-ana aduna kamo'y amnesya, sigurado gayud.

⁸² Ug, hinumdumi, dili na kamo lungsoranon sa Amerika kon dili n'yo arang nga mamahimong kabahin niini. Angay gayud nga mahimo kamong kabahin, kung unsa ang Amerika, angay gayud nga mao usab kamo. Kinahanglan ko nga mahimong kabahin niya. Ingon nga kini mao ang akong nasud, kinahanglan kong mahimong kabahin niini. Kung unsa siya karon, mao ako. Kita n'yo, kung unsa siya kaniadto, mao ako. Bisan unsa pa siya kaniadto, mao gihapon ako kung unsa siya kaniadto.

⁸³ Ingon nga usa ka Amerikano, midunggo ako kaniadto sa Plymouth Rock, kauban niya, kauban ang unang mga amahan. Gikinahanglan ko; ingon nga kabahin ako kaniya. Misakay ako kaniadto kauban ni Paul Revere, aron pasidan-an siya bahin sa mga peligro kaniya. Kung usa ako ka tinuod nga lungsoranon sa Amerika, midunggo ako kaniadto sa Plymouth Rock. Misakay ako kaniadto kauban ni Paul Revere, aron pasidan-an siya bahin sa peligro kaniya. Nasabtan ba ninyo kung unsa ang buot kong ipasabot karon?

⁸⁴ Gitabok ko kaniadto ang niyebohon nga Delaware, kauban ni George Washington, nga kauban ang iyang mga sundalo nga nakatiniil. Atua ako, ingon nga naila ako kauban niini nga nasud. Kabahin ako sa gibuhat niya didto kaniadto, kabahin pud siya sa kung unsa ang ginabuhat ko karon. Naila ako kauban ni Washington kaniadto, didto sa Delaware.

⁸⁵ Mibarug ako kaniadto kauban ni Stonewall Jackson, sa dihang hilabihan gayud ang mga babag nga dili siya molampus, ug nangutana sila, "Unsaon man nimo pagbarug nga mora og paril nga bato, sa dihang grabe man ang mga babag batok kanimo?" Ang gamay'ng maulawon nga lalaki nga kolor asul ang mga mata misipa sa abog nga sul-ob ang iyang botas, miingon siya, "Dili ako nagainom og tubig gawas kon mapasalamatan ko una ang Dios nga Makagagahum-sa-tanan alang niini."

Gikinahanglan kong mobarug nga daw sa paril nga bato kauban niya. Mibarug ako kaniadto kauban ni Stonewall Jackson. Ingon nga Amerikano, naila ako kauban niya ug sa iyang baruganan. Gitabok ang Delaware! Nagpakig-away sa mga gubat!

⁸⁶ Gipataas ko ang bandila. Kauban nila ako kaniadtong gipataas nila ang bandila didto sa Guam. Human nga gitugyan sa liboan ka mga Amerikanong kasundalohan ang ilang kinabuhi, ug kaniadtong midagan didto kadtong gamay'ng grupo ug gipataas ang bandila, naila ako niadtong pagpataas sa bandila; ang matag usa kanato. Ang tanang lungsoranon sa Amerika naila man kauban niadtong bandila nga gipakayab didto sa Guam. Ngani sa dihang nadungog ko nga napahimutang na nila ang bandila didto, midagayday ang mga luha sa akong mga aping. Ako kadto. Kamo kadto. Kita mang tanan kadto, sa dihang naila kita didto kauban niadto.

⁸⁷ Ang tanan-tanan kung unsa siya, mao ako. Ang tanan niyang dungog dungog pud nako. Ang tanan niyang kaulawan kaulawan pud nako. Kung nakabuhat man siya og mga makauulaw nga butang, nan kinahanglan kong motan-aw kaniya . . . barugan ang iyang kaulawan. Kung nagadawat siya og kadungganan, nagadawat pud ko og kadungganan uban kaniya, tungod kay naila man ako kauban niya. Karon, aron nga maila, kinahanglan nga barugan sa Amerika ang tanang kaulawan sa Amerika, ang tanang dungog sa Amerika, ang tanan-tanan kung unsa siya kaniadto. Ang tanan kung unsa siya karon, o kung unsa siya sa umalabot, maila ka kauban niini.

⁸⁸ Karon, aron mahimong usa ka tinuod nga Cristohanon, kinahanglan mo usab nga mahimong ingon niana. Ayaw natong hikalimtan kana. Ang tanan kung unsa Siya, naila ako kauban Niya. Naila ako kauban Niya.

⁸⁹ Matikdi, ug anaa Siya kanako, ug ako anaa Kaniya. Matikdi, kung ingon-ana, ang matag Cristohanon nga usa ka tinuod matuod nga Cristohanon—Cristohanon, kauban na Niya, “Kaniadtong nagakadungan sa pag-awit ang mga bitoon ug ang mga anak sa Dios nanagsinggit sa kalipay, sa wala pa ang pagkatukod sa kalibutan.” Naila na kita diha sa walay-kamatayon nga mga kahimtangan kauban sa Dios, niadtong napulo ka milyon ka tuig sa wala pa naporma ang kalibutan. Atua na ako kaniadto kauban Niya. Kung aduna ako’y Kinabuhing Walay Katapusan, atua na ako kauban Niya. Naila na ako kauban Niya, “Kaniadtong nagakadungan sa pag-awit ang mga bitoon ug ang mga anak sa Dios nanagsinggit sa kalipay.”

⁹⁰ Kauban ko Siya kaniadtong gitawag Niya si Abraham sa edad nga—nga setenta’y-singko anyos, ug ang iyang asawa saisenta’y-singko na, ug gisultihan siya nga makabaton sila og usa ka bata. Kauban ko siya kaniadtong gibarugan niya

ang MAO KINI ANG GINAINGON SA GINOO, “Makabaton ako og anak.” Mibarug ako kauban niya. Ang tanang uban pa nga Cristohanon mibarug pud kauban niya. Kauban ko siya sa dihang miabot kaniya ang mga panulay. Kauban ko siya kaniadtong mitungas siya sa ibabaw sa bukid, aron ihalad si Isaac. Kauban ko siya sa dihang mitungha ang laking-karnero.

⁹¹ Kauban ko kaniadto si Joseph sa dihang gisalikway siya sa iyang mga igsoon, tungod kay espirituhanon siya ug ang tanang uban pa kanila mga karnal. Kauban ko siya sa dihang nasayran niya ang kaulawan nga kinahanglan niyang barugan tungod sa kaugalingon niyang mga igsoon. Kung unsa siya kaniadto, mao pud ako. Kung unsa ako, mao pud siya. “Kay usa ra kitang tanan diha kang Cristo Jesus.” Kauban ko si Joseph sa iyang langub, lubnganan. Kauban ko siya kaniadtong miadto siya sa tuo ni Faraon. Gikinahanglan n’yong maila kauban niya.

⁹² Kauban ko si Jacob niadto nga gabii sa dihang nagpakigbugno siya tibuok gabii sa Manulonda. Nagpakigbugno pud ko, mismo. Nasayod ako sa iyang giagian. Busa nagpakigbugno ako kauban ni Jacob niadtong mao mismong higayon nga nagpakigbugno siya, kay igsoon man niya ako.

⁹³ Kauban ko kaniadto si Moises sa dihang miadto siya sa Egipto. Kauban ko si Moises didto sa nagadilaab nga sapinit. Kung usa ikaw ka Cristohanon, nan naila ka kauban niadto nga mga tawo sa Biblia. Ayaw n’yo kini kalimti! Kauban ko si Moises sa dihang mitalikod kaniya ang tibuok katawohan. Kauban ko si Moises sa dihang gitabok niya ang Dagat nga Mapula. Sa dihang gipataas niya ang iyang kamot ug milakaw sa unahan, ug nabuka ang Dagat nga Mapula, naila ako diha kang Cristo kaniadto mismo, ug kauban ko si Moises niadtong taknaa.

⁹⁴ Unsa man ang mga Cristohanon kaniadto, unsa man ang mga magtotoo kaniadto, ang matag magtotoo sa karon naila uban niadto mismo nga tawo. Bisan unsa man, angay gayud kamong maila. Ayaw n’yo kalimti kana. Pag nahikalimtan ninyo, nan aduna kamo’y espirituwal nga amnesia; nahikalimtan na ninyo kung kinsa kamo.

⁹⁵ Bueno naila uban kaniya, uban ni Moises, sa dihang gitabok niya ang dagat.

⁹⁶ Kauban ko si Elias niadtong mga adlaw ni Ahab, sa dihang gikinahanglan nila kaniadtong mopili kung kinsa ang ilang alagaran, ang Dios ba o si Balaam. Kauban nato siya didto sa Bukid sa Carmelo, kaniadtong gikinahanglan niyang mopili, kay naila man kita diha sa Lawas sa mao ra nga Dios kang kinsa siya naila. Busa kung naila kita diha niana nga Lawas, kung ingon-ana angay natong hinumduman nga atua kita didto kauban niya. Tinuod kana.

⁹⁷ Bueno, kauban ko kaniadto si David, sa dihang gisalikway siya sa kaugalingon niyang mga kaigsoonan. Kauban ko si

David; kamo, usab, kung usa man kamo ka Cristohanon. Kinahanglan n'yong maila diha sa pagsalikway kaniya.

⁹⁸ Kauban ko kaniadto ang Hebreohanong mga anak, didto sa nagdilaab nga hudno, sa dihang ang—ang kalayo dili makahimo sa pag-ugdaw kanila tungod sa Presensiya sa ikaupat nga Tawo.

⁹⁹ Kauban ko kaniadto si Daniel, didto sa langub sa mga leon. Naila ako didto sa sulod, sa dihang naila siya sa Manulonda sa Ginoo didto sa sulod.

¹⁰⁰ Sigurado gayud nga kauban ko Siya kaniadto sa Kalbaryo. Gikinahanglan kong maila uban Kaniya didto sa Kalbaryo. Gikinahanglan kong maatua sa usa ka dapit, diin, dili lamang ako naila uban Kaniya sa Kalbaryo, kondili namatay sàb ako uban Kaniya sa Kalbaryo. Ang matag Cristohanon gikinahanglan sàb nga namatay uban Kaniya sa Kalbaryo. Kung wala kamo namatay uban Kaniya sa Kalbaryo, dili kamo mamahimong Iyaha. Atua ako kaniadtong namatay Siya. Namatay ako uban Kaniya. Ug pagkahuman kauban ko Siya sa dihang nabanhaw Siya gikan sa mga patay. Mibangon ako niadtong buntag sa Pasko sa Pagkabanhaw uban Kaniya, sa pagkabanhaw. Unsa man ang Iyang gibuhat, atua ako mismo uban Kaniya; mao man usab ang matag magtotoo.

¹⁰¹ Ug karon naglingkod ako uban Kaniya sa Langitnong mga Dapit diha kang Cristo Jesus, nga ang tanang gahum sa impiyerno nabuntog na, pinaagi Kaniya. Ang matag Cristohanong magtotoo naglingkod usab nga ingon niana, tungod kinahanglan kamong maila.

¹⁰² Karon nakaplagan ko ang akong kaugalingon, sa niining kaulahiang mga adlaw, nga kauban ang daghang mga Cristohanong nagatotoo, naila diha sa Iyang ministerio. “Siya mao sa gihapon kagahapon, karon, ug hangtud sa kahangturan.” Nakaplagan ko ang akong kaugalingon, niini nga adlaw, nga naila diha sa Iyang ministerio. Nakaplagan ba usab ninyo ang inyong kaugalingon, nga nagatoo niini, nagalakaw kauban niini? Matikdi, ang mga buhat nga Iyang gibuhat, miingon Siya nga pagabuhaton usab sa magtotoo ang mao gihapong butang. “Ang mga buhat nga Akong ginabuhat inyo usab pagabuhaton.” Kung ingon-ana maila ba kamo uban Kaniya? Kung ingon-ana pagmoabot ang kaulawan sa Pulong, mahimo ba ninyong barugan ang kaulawan sama sa gibuhat Niya, kita n'yo, ang maila uban Kaniya? Naila ako uban Kaniya.

¹⁰³ Kauban ko Siya kaniadtong Adlaw sa Pentecostes. Kauban ko ang mga tinun-an didto sa itaas, og naila uban kanila diha sa bautismo sa Espiritu Santo.

¹⁰⁴ Nahunahuna ko hinoon kung dili ba kaha aduna na'y ingon ka grabe nga amnesia ang iglesia karon nga dili na sila, ang uban kanila, dili na gani nagatoo nga adunay ingon-anang butang sama sa Espiritu Santo. Nakita n'yo na kung asa

nahidangat ang iglesia? Duna na kini og usa ka grabe nga kaso sa amnesia! Kita n'yo, nahikalimtan na nila nga kadto mao si Jesus Cristo kaniadto. Nahikalimtan na nila kung unsa si Jesus Cristo. Nahikalimot na sila. Abi nila Siya lamang mao'y usa—usa ka maghihimo-og-balaod, o usa ka propeta, o usa—usa ka maayo nga tawo. Nahikalimtan nila nga Siya mao ang Dios. Nahikalimtan nila nga Siya mao sa gihapon kagahapon, karon, ug hangtud sa kahangturan. Ug nagkaaduna ang iglesia og usa ka grabe nga kaso sa espirituwal nga amnesia. Nahikalimtan na nila ang tanan niini nga mga butang. Wala na nila Kini mahisabti.

¹⁰⁵ Kauban gayud nato ang mga tinun-an niadtong Pentecostes, og naila kauban nila. Naila ako kauban sa wali ni Pedro niadtong Adlaw sa Pentecostes, diha sa Mga Buhat sa ika-2 nga kapitulo. Nadungog ko kung unsay iyang gisulti. Nagatoo ako sa iyang gisulti. Gituman ko ang iyang gisulti. Karon naila ako sa mao ra mismong butang.

¹⁰⁶ Dili unta kamo magkaaduna og espirituwal nga amnesia. Tungod, pagmagkaaduna kamo niana, mapaila n'yo ang inyong kaugalingon uban sa lahi nga butang. Mao nga magpabilin lang kamo mismo nianang Pulong!

¹⁰⁷ Kauban nato ang Iglesia kaniadtong gisugo kini ni Jesus Cristo, diha sa Mga Buhat, sa ika-16 nga kapitulo. “Panglakaw kamo sa tibuok kalibutan, ug iwali ang Maayong Balita sa tanang binuhat.” Gusto kong maila dinha, “Sa tibuok kalibutan, sa tanang binuhat.” “Kini nga mga ilhanan maganunot kanila nga nagatoo,” maila diha niana.

¹⁰⁸ Bueno, karon, naila ba kamo uban niana, o basin aduna na kamo og espirituwal nga amnesia, mao nga naamgo ninyo nga dili diay kamo nagatoo nga kana nga mga ilhanan maganunot sa mga magtotoo? Kita n'yo, kung dili kamo nagatoo niana, nan aduna gyud kamo'y espirituwal nga amnesia, kita n'yo, nahikalimtan na ninyo nga gisaad kana sa Dios. Ang ingon Niya, “Kini nga mga ilhanan maganunot kanila nga nagatoo.” Ayaw n'yo kini kalimti. Hinoon dili man ninyo mahimong hikalimtan kini ug mahimo gihapong usa ka Cristohanon. Gikinahanglan n'yong maila kauban niini.

¹⁰⁹ Gikinahanglan n'yong maila pinaagi sa San Juan sa ika-14 nga kapitulo, sa ika-12 nga bersekulo. “Ang nagatoo Kanako, ang mga buhat nga Akong ginabuhat pagabuhaton usab niya.” Ayaw n'yo kini kalimti. Kung mahikalimot kamo, nan aduna kamo'y espirituwal nga amnesia. Nakalimtan na ninyo kung kinsa kamo. Nakalimtan na ninyo kung unsa ang kahulogan sa inyong testimonyo.

¹¹⁰ Unsa man usab ang, Iyang giingon, “Kung kamo magapabilin Kanako, ug ang Akong Pulong anaa kaninyo, managpangayo kamo sa bisan unsa nga buot ninyo ug

pagabuhaton kini kaninyo”? Naila ba kamo dinha, nga toohan nga mao kana ang Kamatuoran? Sa Marcos 11, sa dihang miingon Siya, “Kung magaingon ka niining bukid, ‘bumalhin ka,’ ug dili magduhaduha sa imong kasingkasing, kondili toohan nga mamatuman gayud kanang unsa ma’y imong giingon, maangkon mo kanang unsay imong giingon.” Maila ba kamo dinha, nga toohan nga mao kana ang Kamatuoran? Kung dili, nan aduna na kamo’y espirituwal nga amnesya.

¹¹¹ Ug—ug pag makalimot na kamo, mawad-an kamo og pang-Cristohanong balanse. Dili na ninyo masulti kung asa kamo nahisakop. Moingon mo, “Methodist ako. Baptist ako. Mao kana ang nahibaloan ko mahitungod niini. Pentecostal ako. Ako’y *ingon-ani*, *ingon-ana*, o ang *uban pa*.” Bantayi n’yo! Mahimong nagapasabot kana nga ang timailhan sa maong sakit makita na diha kaninyo, nga aduna na kamo og espirituwal nga amnesya.

¹¹² Moingon mo, “Bueno, Igsoong Branham, ako—nagatoo ako *nini*, ug ako—dili ako halos...” Karon kadali lang. Kung gisaad sa Dios nga buhaton kining mga butanga, ug giingon nga mamahitabo ang mga niini sa kaulahiang mga adlaw, ug ginapahilayo kamo niini sa inyong kredo, nan usa kana ka maayo nga timailhan nga akong makita ang ilhanan sa maong sakit nga anaa na kaninyo. Espirituwal nga amnesya kana. Nahikalimot na kamo sa pag-ila sa inyong kaugalingon kauban sa Pulong.

¹¹³ Moingon mo, “Dili ko nagatoo nga mamaayo ang mga may sakit.” Aduna kamo’y espirituwal nga amnesya.

¹¹⁴ Moingon mo, “Dili ko nagatoo sa bautismo sa Espiritu Santo.” Espirituwal nga amnesya gayud!

¹¹⁵ Moingon mo, “Ako—dili ako nagatoo nga nagsaad ang Dios nga buhaton kining mga butanga sa kaulahiang mga adlaw.” Kung ingon-ana naminaw kamo sa usa ka kredo, o sa kung unsa nga doktrina, imbis nga sa Biblia. Aduna kamo’y espirituwal nga amnesya. Mao nga dili na kamo mahibalo kung asa kamo nahisakop. Nagapamahayag kamong, “usa ka Cristohanon,” pero ginapanghimakal ang Pulong. Ginadala kamo pabalik ngadto sa espirituwal nga amnesya, kita n’yo, wala na mo mahibalo kung asa kamo nagabarug. Aduna kamo’y espirituwal nga amnesya. Dili n’yo na maila ang inyong kaugalingon kauban sa mga Kasulatan.

¹¹⁶ Gikinahanglan n’yong mahiuban sa mga tinun-an. Gikinahanglan n’yong mahiuban sa tibuok Kasulatan, mahiuban sa Iglesia sa dihang gisugo kini. Apan, ania, sa dihang gisugo ang Iglesia, “Panglakaw kamo sa tibuok kalibutan ug iwali ang Maayong Balita; kini nga mga ilhanan maganunot kanila nga nagatoo,” mao kadto ang sugo kaniya. Karon aduna sila’y . . . Mao kadto ang sugo.

¹¹⁷ Apan natakboyan na man sila og grabe nga kaso niining espirituwal nga amnesya, sama lang ni Eva didto sa . . . sa iyaha,

didto sa tanaman, usa ka adlaw. Bueno susama siya sa Israel, nga nagaantus gumikan niining mao ra nga sakit, usa ka allergy gumikan sa usa ka pang-seminaryo nga pagkaon nga maghinungdan kaninyo og espirituwal nga amnesya. Mokaon ka og usa ka pang-seminaryo nga pagkaon, ug magkaaduna gyud ka og allergy, ug unya, mahibaloan mo na lang, matakboyan ka na og grabe na nga amnesya. Dili ka na motoo sa bisan unsa man nga ginaingon sa Biblia.

¹¹⁸ Mao kana'y problema sa iglesia sa karon. Mao kana'y problema mao nga dili na kita mahimong magkaaduna pa og rebaybal sa karon. Mao kana'y problema sa mga tawo sa karon. Nadala na gayud sila sa tanang butang, ug sa matag ismo nga mahimong motungha, hangtud nga dili na sila mahibalo kung unsa ang husto ug sayup. Eksakto. Dili na niya mahinumduman ang iyang Ginoo. Dili na niya mahinumduman ang Pulong sa Ginoo. Dili na niya mahinumduman ang saad.

¹¹⁹ Ingon niana mismo ang nahitabo sa Israel, kaniadtong miabot si Jesus sa esena. Wala na sila mahinumdum, nga, "Usa ka ulay ang manamkon." Wala na sila mahinumdum nga miingon si Moises, "Ang Ginoo nga inyong Dios magpatindog og usa ka Propeta nga sama Kanako." Aduna na sila og espirituwal nga amnesya.

¹²⁰ Eksaktong ingon niana mismo ang nadangatan sa iglesia karon. Siya miingon, "Mahitabo sa kaulahiing mga adlaw," nga mahitabo kining mga butanga, nga makita nato nga nagakahitabo na, ug ang iglesia nagbuy-od na nga ingon ka patay sama sa alas dose. Unsa man kana? Espirituwal nga amnesya. Nagapatawag kita nga Pentecostal, ug dili nato maila, ug dili nato maila ang atong kaugalingon diha sa Pulong sa dihang gikawali man Kini sa gahum sa pagkabanhaw ni Cristo; ug Siya nga ania sa atong taliwala, nga ginapamuhat kini, ug eksaktong ginabuhat kung unsa ang Iyang gikaingon nga pagabuhaton Niini. Dayon, magbantay kamo, ingon nga gidala na kita sa atong sistemang pang-denominasiyon paingon sa espirituwal nga pagka-amnesya. Mao nga nagaantus kita. Wala na ta mahibalo kung asa kita nahisakop. Ginadala na sa tawo ang iyang mga dokumento gikan *niini* nga iglesia ngadto sa *ubang* iglesia, ug sa *niini* nga iglesia, ug sa *ingon-ani* nga ismo ug *ingon-ana* nga ismo. Kita n'yo?

¹²¹ Ang gikinahanglan nato, pag-usab, mao ang usa na usab ka Amos nga moabot sa esena, nga dala-dala ang MAO KINI ANG GINAINGON SA GINOO. Dawaton ba nato siya? Halos susama ra sa gibuhit nila kaniadto. Wala gayud nila gidawat siya. Dili pud nila siya dawaton karon. Dili gani siya makasulod sa usa ka lugar, halos, aron magwali. Bueno, tinuod gayud kana, tungod kay nagaantus man ang iglesia sa niining espirituwal nga amnesya.

¹²² Bueno, ngano man? Nagsaad ang Dios sa niining kaulahiang mga adlaw, “Sa diha nga ang Anak sa tawo igapadayag na,” sumala sa Lucas, sa ika-17 nga kapitulo, “sa ilhanan nga nahitabo kaniadto sa Sodoma, mahitabo pag-usab.” Ug nakita sa mga tawo nga nahitabo na kini, ug ang uban kanila dili gani motoo niini. Gahunahuna sila nga telepatiya kini. Gahunahuna sila nga usa kini ka espiritu sa yawa. Unsa man kini? Nagaantus sila sa espirituwal nga amnesia. Eksakto gyud. Dili nila masabtan ang Ginoo. “Si Jesus Cristo mao sa gihapon kagahapon, karon, ug hangtud sa kahangturan.” Kung unsa Siya kaniadto, mao gihapon Siya karon.

¹²³ Apan, ang nahitabo, dili na nato maila ang atong kaugalingon sa Pulong. Ngano man? Siya, wala na siya kahibalo kung usa ba siya ka kapunongan o kung usa ba siya ka iglesia. Ayaw niya nga tawgon siya nga usa ka kapunongan, ug dili pud siya mahimong tawgon nga usa ka iglesia; kay, ang pagatawgon nga usa ka iglesia, kinahanglan maila man ang iyang kaugalingon kauban ni Cristo. Kana ang nagapahinungdan og espirituwal nga amnesia kaniya. Ug ayaw niya nga tawgon siya nga usa ka kapunongan. Busa dili kini ang iglesiang Pentecostal, ang iglesiang Methodist, ang iglesiang Baptist; kondili kini mao’y kapunongan sa Pentecostal, kapunongan sa Methodist, ug kapunongan sa Baptist, tungod kay dili man siya maila diha sa Pulong. Ug sa diha nga napadayag ang Pulong, dili nila sa gihapon toohan Kini. Mao nga usa kini ka sakit, espirituwal nga amnesia. Dili maila ang ilang mga kaugalingon; wala sila kahibalo kung asa sila nahisakop. Husto.

¹²⁴ Sama lang kini mismo sa pag-hybrid og usa ka butang. Ingon sa makadaghan ko nang giingon, “Mahunahuna ko sa kanunay nga ang usa sa pinakahinangal nga mga butang nga nakita ko sukad-sukad mao ang usa ka mula.” Kita n’yo, usa siya ka hybrid. Kita n’yo, ang iyang inahan usa ka kabayo, ang iyang amahan usa ka asno, ug wala gayud siya mahibalo kung asa siya nahisakop. Ug mahibaloan mo na lang, imong—imong—imong—mahimo mong ipasanay siya ug manganak og usa ka asno, ug unya . . . o manganak og mula, apan ang mula dili na makapasanay pag-usab sa kaugalingon niini. Kita n’yo, dili niya mahimo. Dili mo siya matudloan og bisan unsa. Gahi siya’g-ulo. Dili gyud ka makasulti og unsa man . . . Mahimo mong plastaron kanang dagkung hataas nga mga dalunggan. Ug maghulat siya bisan sa pinakadugay nga adlaw sa iyang kinabuhi, sa dili pa siya mamatay, para sipaon ka. Kana lang. Kanunay siyang nagahulat og usa ka butang para ipabuto kana kanimo, kung mahimo niya.

¹²⁵ Ug nagpahinumdom kana kanako mahitungod sa daghang gitawag nga hybrid nga mga Cristohanon. Gihimo na nilang hybrid ang iglesia hangtud nga natakboyan na sila og sakit nga

espirituwal nga amnesya. Dili sila makapadaghan og bisan unsa.

¹²⁶ Nagahisgot sila mahitungod sa hybrid nga mais. Wala ma'y pulos ang hybrid nga mais. Mao kana ang pinakadili-maayong butang nga mahungit n'yo sa inyong baba, ang bisan unsa man nga gi-hybrid. Mao kana'y hinungdan nga kinahanglan mo pang amumahon kining mga tanum, ug mga gipang-hybrid, ug isprihan kini ug ipa-doktor kini ug bebi-bebihon kini. Ngano man? Tungod kay dili man nila mapahilayo ang mga insekto gikan niini.

¹²⁷ Pero ang usa ka tinuod, puro nga kaliwat, dili mo na kinahanglan pang butangan siya og pang-patay sa kagaw. Aduna na siya'y Gahum sa kinasuloran niya mismo, aron mopahilayo kaniya ang mga insekto. Mao kana'y gikinahanglan para mopahilayo ang mga insekto sa dili-pagtoo gikan sa usa ka tinuod og matuod nga tawong puno sa Espiritu.

¹²⁸ Ipananglitan ta ang usa ka mula, ug umadto ka og istoryaha siya, moingon, "Hoy, mula, gusto ko nga buhaton mo ang *ingon-ani*, *ingon-ana*."

¹²⁹ Molingkod lang siya dinha, "Haw! Haw! Haw!" Nga nagapataas-paubos ang dagkung mga dalunggan. Ngani nakakita na ako og—og daghang ingon niana nga mga Cristohanon, kono.

¹³⁰ Moingon ka, "Si Jesus Cristo mao sa gihapon kagahapon, ug hangtud sa kahangturan. Kini nga mga ilhanan maganunot kanila nga nagatoo."

¹³¹ "Haw? Nagatoo ko nga milabay na ang mga adlaw sa milagro. Haw? Haw? Haw?" Kita n'yo, wala siya mahibalo kung unsa ang iyang ginatooan. Walay unsa man nga iyang nahibaloan. Wala siya mahibalo kung asa siya naggikan; wala siya mahibalo kung asa siya paingon. Aduna siya'y amnesyang kabayo. Wala siya mahibalo kung asa siya naggikan, ug wala pud siya'y mapaingnan.

¹³² Apan gusto ko ang usa ka tinuod nga puro ang kaliwat. Oh, malumo siya. Maistorya mo siya. Nasayod siya kung kinsa ang iyang papa, kung kinsa ang iyang mama, kung kinsa ang iyang lolo ug lola. Aduna siya'y mga dokumento mahitungod sa iyang kaliwatan aron ipakita kung asa siya naggikan.

¹³³ Ug gusto ko ang usa ka Cristohanon nga dunay kagikanaan, nga mahimong balikan ang Pulong sa Dios, ngadto sa adlaw sa Pentecostes, ug ilhon ang ilang mga kaugalingon kaniadto kauban sa mga balaan, diin mikunsad kanila ang Gahum sa Espiritu Santo. Ingon-ana ang usa ka Cristohanong dunay kagikanaan. Nasayod siya kung asa siya naggikan. Dili siya maila nga kauban sa Methodist, Baptist, o unsa pa man. Kondili maila siya diha sa Pulong sa Dios. Nasayod gyud siya mismo kung asa siya nagabarug. Ang harianong Dugo sa iyang Amahan nagadagayday diha kaniya; ang Dugo ni Jesus Cristo.

Nasayran niya kung unsa ang ginabuhat Niini! Ginatooohan niya ang matag Pulong. Nagapamuhat ang Dios pinaagi kaniya ug ginapanghimatud-an kini pinaagi sa mga ilhanan nga Iyang gisaad nga maganunot. Wala siya'y unsa mang espirituwal nga amnesya. Usa siya ka tinuod nga puro-ang-kaliwat. Gusto ko kana.

¹³⁴ Apan ang iglesia sa karon aduna na'y usa ka grabe nga kaso sa espirituwal nga amnesya. Wala kini nahibalo kung asa kini nahisakop. Nahikalimtan na niini ang tanan-tanan mahitungod Niini, nahikalimtan na niini ang tanang mga butang nga maoy makapahimo unta niini nga usa ka Iglesia.

¹³⁵ Unsa ba ang nagpahimo kanatong ingon ka dato sama sa kung unsa kita karon? Midangat kini pag-usab sa kahimtang sa Laodicea, nahibalik sa pagkadato nga kahimtang sama sa Israel kaniadto. Pero kaniadtong kabus pa kini ug misalig pa gayud sa Dios alang sa tanang butang nga mahimo niini, sa tanang butang nga naangkon niini, misalig kini sa Dios; kauban niini kaniadto ang Dios, ug espirituwal pa kini, ug nagpadayon gayud. Apan sa diha nga nadato na kini, ania kung unsa ang nahitabo: natukod ang ilang mga siyudad, ug ang ilang mga kababayan-an nahimo nang imoral, dayon gipahanugotan ra kini sa ilang kalalaken-an, gipaubos na sa ilang mga magwawali ang sukaranan, ug gisalikway nila ang mga propeta. Ug ingon niana nga kahimtang ang ilang nadangatan. Ang nagpahinungdan niadto, mao ang paghikalimot nila kon asa naggikan kadto nga mga panalangin.

¹³⁶ Ug kamong mga Methodist, ug kamong mga Baptist, ug kamong mga Presbyterian! Kamong mga Methodist mahinumduman n'yo man si John Wesley. Kamong mga Baptist! Ug gihilakan gyud kaniadto ni John Smith ang mga pagkinabuhi sa mga tawo hangtud nga gikinahanglan na siyang agakon sa iyang asawa paingon sa lamesa, nanghubag gayud ang iyang mga mata, gumikan sa paghilak ug pag-ampo tibuok gabii. Pero unsa na ma'y nahitabo?

¹³⁷ Miingon si John Wesley nga ang usa sa dagkung mga butang... nagatoo ko nga usa sa mga amahan sa nahaunang Methodist ang miingon, "Ang kaulawan sa mga anak sa iglesiang Methodist, mao'y tungod sa hinay-hinay nga pagkahimong ingon na ka kalibutanon, nagasul-ob na sila og mga singsing diha sa ilang tudlo." Unsa pa kaha'y isulti niya karon, nga nanagsul-ob na sila og purol?

¹³⁸ Unsa ma'y nahitabo? Espirituwal nga amnesya. Mao gayud kana, nahikalimtan na kung asa kamo naggikan. Naangkon man ninyo ang tanan niini nga mga butang tungod sa gasa, og ang kamaayo sa Dios ang naghimo niini para sa inyo.

¹³⁹ Nahunahuna n'yo ba nga usa kini ka talagsaong butang? Tukma gayud kini sa Espiritu ni Jesus Cristo, ang propesiya. Sa Pinadayag, sa ika-3 nga kapitulo, miingon kini, "Tungod kay

ginaingon mo nga, ‘Ako dato, walay nakulang kanako,’ ug wala nanghibalo nga ikaw kabus, buta, alaut, makaluluoy, hubo, ug wala mahibalo niini” Kita n’yo, wala mahibalo niini! Unsa man kini? Espirituwal nga amnesya. Sila wala mahibalo niini.

¹⁴⁰ Anaa man sa mga kasimbahanan ang—ang salapi karon. Ngani walay usa ka simbahan, halos, sa nasud, nga usa ka denominasyon, nga dili nagkantidad og minilyon—milyon ka pilo nga dolyares. Nanagtukod og minilyon ug minilyon ka dolyares ang kantidad sa mga bilding ug mga ingon-anang butang, pero nagawali nga haduol na ang Pag-abot sa Ginoo. “Dato,’ ug miingon, ‘Walay nakulang kanako.’” Ang pinaka edukado nga mga magwawali nga aduna sila, mas daghan ang nahibaloan nga teolohiya kaysa nasayran nila kaniadto. Ug anaa kanila ang pinakadagku nga mga bilding, ang pinaka-pinili nga mga lugar sa siyudad. Aduna sila’y katungod sa unsa mang butang nga gusto nilang buhaton. Ug pagkahuman unsa ma’y nahitabo kanila? Nagkaaduna og espirituwal nga amnesya ug nahikalimot na nga ang Dios ang nagbuhat niadto para kanila, sama lang sa Israel kaniadto.

¹⁴¹ Ug nagproposiya ang Biblia, gipadala ni Jesus Cristo ang Iyang manulonda ngadto kang Juan ug miingon, nga kining kaulahiang kapanahonan sa iglesia magkaaduna niining espirituwal nga amnesya. Sila’y “alaut,” timan-i n’yo. Gahunahuna sila nga sila mao’y daku. Gahunahuna sila nga aduna sila og kung unsang butang. Apan miingon Siya nga sila’y “makaluluoy, alaut, kabus, buta, hubo, ug wala mahibalo niini.” Ug wala na’y paagi para sultihan sila.

¹⁴² Karon, kung anaa dinha sa dalan ang usa ka lalaki, nga nagpakaulaw, o usa ka babaye, nga hubo, buta, diha sa dalan, makaluluoy gayud ang mamaanaa sa ingon-niana nga kahimtang. Apan kung anaa sila sa husto nilang pangisip, og nahibalo kung kinsa sila, nga sila’y tawo, ug angay unta silang magsul-ob og bisti; bueno, gawas mo dinha; sila’y—sila’y mga tawo, nga angay unta nga maila kauban sa kaliwatan sa tawo; pero anaa dinha nga, “alaut, makaluluoy, buta, ug hubo.” Ug moadto ka sa iyaha, moingon, “Igsoon, hubo man ka.”

¹⁴³ “Karon, ania! Ako si *Doktor Ingon niini-ug-ingon niana!* Ayaw panghilabot sa uban. Sultihan ta ka, miyembro ako sa *Ingon niini-ug-ingon niana!* Wala ka’y labot, ikaw nga holy roller, para sultihan ako og bisan unsa!” [Blangko nga bahin sa teyp—Ed.]

¹⁴⁴ Sultihan sila nga, “Sayup para sa lalaki nga buhaton ang ingon niini, ug ang mga tawo nga buhaton ang mga butang nga ilang ginabuhat.”

¹⁴⁵ Ug ipahibalo nila kanimo nga halapad man gud kono ang panghunahuna sa ilang magwawali. Kita n’yo? Unsa man kini? Kini’y, tungod nahikalimtan na nila ang mga sugo sa Ginoong

Jesus. Dayon kon mokanaug Siya ug buhaton ang mga ilhanan ug mga katingalahan nga Iyang giingon nga pagabuhaton Niya, ayaw nilang toohan kini. Espirituwal nga amnesya kini. Kita n'yo, nahikalimot na sila! Ug sila'y hubo, ug wala mahibalo niini, wala makaamgo niini.

¹⁴⁶ Gahunahuna sila, “Basta miyembro lang ako sa iglesia, mao lang kana ang gikinahanglan.” Oh, igsoon, walay kalahian sa Dios kung usa man ikaw ka Mason o unsa man, unsa mang uban pa nga kapunongan. Ang magpamiyembro sa iglesia, wala kana nagkahulogan ni unsa man sa Dios.

¹⁴⁷ Gikinahanglan n'yong mahimong mga anak nga lalaki ug mga anak nga babaye sa Dios. Gikinahanglan n'yong matawo sa Dios, ug ang Dios mao ang Pulong. Sa dihang nahimo akong kabahin sa akong amahan, nahimo akong kinatibuk-an sa akong amahan. Sa dihang mahimo kamong kabahin sa Dios, mahimo kamong Dios, sa kinatibuk-an. Ang tibuk Niyang Pulong, ginatoohan mo ang tanan Niini.

Espirituwal nga amnesya!

¹⁴⁸ Unsa kaha kung wala kamo mahibalo sa inyong ngalan sa kung unsa kini? Ug kung mao man, gikan kamo sa usa ka maayo nga pamilya, nga nagalaum ako nga ingon-ana kamo, kung naggikan kamo sa usa ka maayong pamilya sa mga tawo, ug unsa kaha kung nakalimtan ninyo ang maong apelyido, ug nagagawas kamo dinha, nga nagakinabuhi nga makauulaw? Moingon sila, “Dili ba Jones ang imong apelyido,” o unsa man. “Bueno, wala ko kahibalo kung kinsa ako.” Kita n'yo? Bueno, kita n'yo, usa kana ka makahahadlok nga butang nga mahitabo, usa ka makahahadlok nga kahimtang nga madangatan.

¹⁴⁹ Bueno, dinha mismo nahidangat ang iglesia. Kini man unta mao ang representasyon ni Jesus Cristo. Pero nakalimtan na niini kana, tungod aduna na ma'y, naitudlo niini, nga mga kredo ug mga denominasyon, nga ilang gidawat imbis ang Pulong. “Ug sila'y hubo, buta, makaluluoy, ug wala mahibalo niini,” ug wala na'y paagi para sultihan sila.

¹⁵⁰ Tingali'g dili na ako makaanhi pag-usab sa Birmingham, apan kini mao ang usa ka higayon nga ilang madungog kini. Kita n'yo? Kita n'yo? Oo. Ako lamang. . . wala ako'y tulubagon sa bisan unsa man gawas lang sa pagpugas og Binhi. Ang Dios na ang magagiya Niini ngadto sa yuta kon diin Kini angay'ng mahulog.

¹⁵¹ Nahikalimtan na, oo, nahikalimtan na nila ang Pulong sa saad. Nahikalimtan na nila. Anaa ang Israel sa ingon niana nga kahimtang kaniadtong miabot si Jesus. Nakalimot na kini. Nanagpaabot sila, oh, ingon nila nga nagatoo kono sila nga adunay moabot nga usa ka Mesias. Pero sa dihang miabot na ang Mesias ug gipaila ang Iyang Kaugalingon pinaagi sa Pulong,

daghan na kaayo sila og mga tradisyon hangtud nga gihimo na nilang walay epekto ang Pulong sa Dios.

¹⁵² Ug nagsaad si Jesus, nga sa dili pa ang katapusang panahon, “Maingon sa nahitabo kaniadto sa Sodoma, mamahimong ingon niana usab kini.” Ug maila kini, nga ang mga tawo daghan na kaayo og tradisyon hangtud nga gihimo na nilang walay epekto ang saad sa Dios, tungod sa ilang tradisyon. Espirituwal nga amnesia! Espirituwal nga amnesia gayud kini. Kita n’yo, nahikalimtan na nila kini nga mga butang.

¹⁵³ “Oh, miyembro man ako sa *ingon-ani*. Ako—gibuhat ko ang *ingon-ani*. Nakasayaw ako diha sa Espiritu. Gibuhat ko ang *ingon-ani*.” Bueno, my, my, wala kana’y unsa man nga kahilambigitan, wala gayud.

¹⁵⁴ Unsaon man ninyo pagkahimong usa ka Cristohanon ug ginapahingmakak ang Pulong? Dili n’yo kana mahimo. Ang Dios mao ang Pulong. Kung ang Pulong anaa sa inyo, kamo ug ang Pulong usa ra. Kung unsa ang tibuok nga Pulong, mao kamo. Amen. Kung nabuhi ako sa niini nga henerasyon, kung unsa kini nga bahin sa Pulong ang gikasaad alang niini nga henerasyon, kinahanglan ingon niana ako. Kung mahimo akong usa ka Cristohanon, kinahanglan kong maila kauban sa tanan nga ginawali ug ginabarugan sa Biblia.

¹⁵⁵ Alleluyah! Tawgon man ako nila og usa ka holy roller, sa gihapon, ug gibati ko gayud ang pagkarelihiyoso karon. Oo, sir.

¹⁵⁶ Kinahanglan kong maila kauban sa tanan-tanan nga ginapamahayag sa Biblia. Ug nagapamahayag Kini, ug, kung wala pa ako natakboyan og espirituwal nga amnesia sa niining moderno nga panahon, sigurado gayud ug mamahimong maila ako uban Niini. Kung ginapanghimakak ko Kini, nan aduna ako’y espirituwal nga amnesia; aduna gyu’y nahitabo, midawat ako og usa ka kredo o usa ka doktrina, o usa ka iglesia o usa ka grupo sa tawo. “Dili nako mahimo kana,” bisan miabot na ang Pulong ug bisan ginapaila na ang Kaugalingon Niini.

¹⁵⁷ Mao kana kon nganong wala naila si Jesus kaniadto. “Oh,” ingon sila, “bueno, balaan kini nga tawo, ug ang among balaan nga sacerdote, ang balaan namong *ingon niini*.”

¹⁵⁸ Ug miingon si Jesus, “Ang yawa, mao ang inyong amahan, ug ang iyang mga binuhatan inyong pagabuhaton.”

¹⁵⁹ Nasayod ba mo nga naghalad si Cain og usa ka maayo nga halad, usab? Sinsero man siya, nagtukod gani siya og usa ka altar, miluhod ug nagsimba, ug naghalad og usa ka halad, ug nag-ampo sa Dios. Ug kung, ang Dios, kon mao lang kana ang gikinahanglan sa Dios, nga magpamiyembro kamo sa iglesia ug magkaaduna og altar, ug magbayad sa inyong ikapulo ug mosimba, ug ang magkinabuhi og usa ka maayo nga kinabuhi; kung mao lang kana ang Iyang gikinahanglan, dili Siya

matarung kaniadto sa paghukom kang Cain, tungod kay ingon-adto man mismo ang iyang gibuhat. Oo, sir. Eksakto gayud.

¹⁶⁰ Apan ang *relihiyon* nagakahulogan ra og “usa ka pangtabon,” ug dili man kamo matabonan pinaagi sa inyong kaugalingong mga buhat. Adunay usa lamang ka butang nga dawaton sa Dios, ug kana mao ang Dugo ni Jesus Cristo. Mao lang kana ang bugtong pangtabon. Gawas Niana, kung moingon mo, “Tumana ang kreda,” espirituwal nga amnesya! Ingon-ana ang nahitabo.

¹⁶¹ Karon matikdi, nahikalimtan na nila ang Pulong nga para sa ilaha. Nahikalimtan na nila ang Biblia. Nahikalimtan na nila ang saad. Nagapaninguha sila nga magkinabuhi sa kahayag sa kung unsa kaniadto ang Methodist, sa kung unsa kaniadto ang Baptist, kung unsa kaniadto si kinsa pa man. Ania na ang saad alang niini nga panahon, ug ginapamulong Kini sa Dios pinaagi sa Iyang Pulong, ug ginapanghimatud-an pag-usab ug ginapamatud-an nga mao gayud Kini, ug sa gihapon dili nila toohan Kini. Espirituwal nga amnesya! Eksakto gayud. Bug-os, bug-os gayud nga mga adunay amnesya, og bug-os gayud nga dili Kini ginatooan.

¹⁶² May usa ka sundalong Pranses. Gisultihan ako kaniadto og usa ka hamubong sugilanon; sa dili pa ta magtapos. Wala ko kabalo nga gabii na diay kaayo, ug aduna pa ko’y mga napulo ka panid nga mga sinulat dinhi nga nahibilin; sa ubang higayon na lang kini pagahisgotan. Matikdi, ang usa ka sundalong Pranses. Aduna sila og usa ka grupo sa mga kasundalohan, ug nagkaaduna sila niining amnesya. Gumikan kadto sa grabe nga pagkahadlok, didto sa gubat. Ug aduna sila’y usa ka programa, ug sila—nanawag sila ug gitugotan nga makaduaw ang mga tawo nga may nangawala nga mga minahal sa kinabuhi ug tanawon kung mailhan ba nila kini nga mga lalaki. Pero wala na’y paglaum para kanila, siguro usa o duha, lang niadto, ang nailhan. Ug pagkahuman gidala na nila ang tanang uban pa kanila, ila nang dalhon sila ngadto sa usa ka sanitaryum, kon diin didto na sila magpabilin sa tibuok nilang kinabuhi.

¹⁶³ Nagpaingon sila sa kilid sa bungtod, nagadagan ang tren; ug mihunong sila sa usa ka istasyon, gipapagawas úsa ang maong mga lalaki ug gipatuyhod-tuyhod ang ilang mga bitiis. Ug migawas didto sa may bungtod ang mga tigbantay, aron bantayan sila, tungod lagi kay dunay amnesya, mao nga, ilang—gikinahangkan nila silang bantayan.

¹⁶⁴ Busa gibantayan nila ang usa ka batan-ong lalaki didto, migawas man siya ug misugod nga nagtan-aw tan-aw niadtong tangke sa tubig, og nagtan-aw tan-aw sa palibot sa bungtod. Gilugod niya ang iyang nawong, ug naniid siya. Ug mitan-aw siya pag-usab, ug nakita niya kadtong tangke sa tubig. Mitan-aw siya sa tibuok palibot sa istasyon, ug hinay-hinay siya nga

milakaw. Imbis nga pahunongon siya sa tigbantay, gisundan hinoon siya niadto.

¹⁶⁵ Mitungas siya sa bungtod, og minaug sa may gamay'ng dalan, miliko pa-tuo ug mitungas sa usa na pud ka gamay'ng bungtod, ug nakadangat sa usa ka gamay'ng payag nga kahoy. Mitan-aw siya. Pagawas didto sa may balkonahe, ang usa ka tigulang lalaki nga may sungkod sa iyang kamot, migawas ug gigakus siya. Miingon, "Anak ko, nasayod gyud ko nga mobalik ka. Ang ingon nila sa ako nga patay na kono ka, pero kabalo ko nga mobalik gyud ka." Ug naulian ang maong batan-ong lalaki. Nawala na ang iyang amnesia. Naila na niya kung kinsa siya. Nasayod siya nga iyaha kadtong amahan.

¹⁶⁶ Oh, sundalo sa Krus, nga nalisang tungod sa ingon ka daghang pagbansay, daghan kaayong mga panghadlok sa denominasyon ug kredo, ug mga butang nga iya sa kalibutan, nganong dili man ka mogawas sa makadiyut ug motan-aw tan-aw sa Biblia? Maglibot-libot, ug tingali'g makaplagan mo ang imong kaugalingon nga maila dinhi sa Pulong, ingon nga usa ka magtotoo, usa sa niining mga adlaw. Mahimong wala ka pa makaila Kaniya. Tingali'g makabalik ka na sa imong kaugalingon, sama niadtong mawaldason nga anak, ug makaplagan ang imong kaugalingon. Mahimong makaplagan mo ang imong pagkaila diha sa mga Pulong sa Dios.

¹⁶⁷ Adunay miingon, niadtong miaging adlaw, sa dili pa lang dugay, nga miingon, "Apan, Igsoong Branham, tan-awa kaming mga Pentecostal, pagkanindot sa among mga simbahan. Aba, kami, aduna kami og mga ministro nga binansay."

¹⁶⁸ Paminaw, kon minyoan sa usa ka lalaki ang usa ka mapangasawa, dili siya nagasalig sa kaanyag niini. Dili. Kondili nagasalig siya sa pagkamaunongon sa panaad sa babaye, sa pulong niini. Dili siya nagasalig sa kaanyag niini. Kondili nagasalig siya sa pagkamaunongon niini.

¹⁶⁹ Ug ingon niana usab pag maminyo kamo ngadto sa Dios, dili kamo nagasalig sa usa ka dakung maanindot nga simbahan nga mahimo n'yong tukoron, kondili sa saad nga gihimo ni Jesus Cristo, nga, "Ako mao sa gihapon kagahapon, karon, ug hangtud sa kahangturan." Nagatoo ba mo niana?

Iduko nato ang atong ulo sa makadiyut.

¹⁷⁰ Nahunahuna ko, karong gabhiona, dinhi sulod sa bilding diin nagalingkod ang mga tawo, diin aniyay mga kalalaken-an ug mga kababayen-an nga Eternal, mga tawo nga paingon-sa-Eternidad, ug nasayod kamo nga sa umalabot nga adlaw o unsa man gikinahanglan n'yong tagboon ang Dios. Ug nahunahuna ko nga basin aduna kamo og diyutay'ng gininhawa nianang amnesia, ug mahimo kamong... Naila kamo diha sa sayup nga butang, ug kamo'y—daw sa gusto ninyong molibot-libot, karong gabhiona, ug hibaloong kung dili ba kamo mahimong

maila diha kang Cristo Jesus? Mahimo ba ninyong ipataas ang inyong kamot, og moingon, “Iampo ako, Igsoong Branham, ako—gitinguha ko nga maila ingon nga usa ka tinuod nga Cristohanon, usa ka tinuod nga magtotoo.” Panalanginan ka sa Dios. Panalanginan ka sa Dios. Panalanginan kamo! Oh, oo, dinha sa palibot. Panalanginan kamo sa Ginoong Dios.

¹⁷¹ Ang si kinsa man dinha sa balkonahe, moingon mo, “Igsoon, nagatoo gayud ako nga Kamatuoran kana. Nagatoo ako, ingon nga mga Cristohanon, dili kami mga Cristohanon nga sama kanila sa una daghan nang mga tuig ang milabay.”

¹⁷² Unsa man kamong mga Pentecostal, sa dihang ang inyong mga inahan ug mga amahan nagatindog kaniadto dinha sa dalan, ug nagapatugtug og karaang tamborin. Ug ang inyong inahan, daw sa unsa nga gikinahanglan niyang... gikinahanglan niyang mangabudlay, ug manglimbasug kauban kamong gagmay'ng mga bata. Usahay wala kamo'y sinina, ug tanan nang uban pa, pero si papa ug si mama maunongon gayud sa Katuyoan, nga ipataas si Cristo.

¹⁷³ Tan-awa kung unsay gibuhath ninyong mga Pentecostal. Singkwenta na ka tuig ang milabay, nanggawas kamo gikan sa organisasyon. Kana ang nakapahimo kaninyo nga Pentecostal, gihimulag n'yo ang inyong kaugalingon gikan sa mga dili-magtotoo. “Ug sama sa usa ka baboy ngadto sa lunangan niini, ug sa usa ka iro sa suka niini,” namalik kamo mismo ug gibuhath ang mao gihapong butang, naghimo ug mao gihapon nga matang sa kagubot nga inyong gigawasan. Unsa ma'y problema? Mikuyanap ang espirituwal nga amnesia sa taliwala sa mga tawo. Aduna na kamo'y mga kredo ug mga dokumento sa inyong denominasyon karon, ug atua na kamo mismo kauban ang tanang uban pa kanila, og gusto nang mokuyog sa tanang uban pa kanila. Gitugotan na ninyo ang inyong mga kababayenan nga putlan ang ilang buhok, og mangmeyk-ap. Kamo, ginatugotan na ninyo sila nga buhaton ang tanan niining mga butanga, ginatugotan na ang tanan niini nga mga butang sulod sa—sulod sa mga iglesia. Unsa man kini? Espirituwal nga amnesia.

¹⁷⁴ Dayon, mahibaloan n'yo na lang, pag mosugod nang moduaw ang Dios nganha sa mga tawo, nan unsa ma'y nagakahitabo? Dili n'yo kini mahimong dawaton. Kita n'yo, migrabe na man gud kamo tungod nianang amnesia, kita n'yo, ang bugtong butang nga sukad-sukad inyong nadungog. Wala ba ninyo mahunahuna nga angay kamong mogawas gikan niana nga kredo sa makadiyut lang ug kuhaon ang Biblia, ug tan-awon kung unsa ang angay nga pagkaila sa usa ka Cristohanon? “Kini nga mga ilhanan maganunot kanila nga nagatoo!”

¹⁷⁵ Sa Mga Buhath, giingon ni Pedro, “Maghinulsol kamo, ang matag usa kaninyo, ug magpabautismo sa Ngalan ni Jesus Cristo

alang sa kapasayloan sa sala, ug madawat ninyo ang gasa nga Espiritu Santo; kay ang saad alang kaninyo, ug sa inyong mga anak, ug sa tanang atua sa halayo, bisan ang kapid-an nga pagatawgon sa atong Ginoong Dios.” Kung sultihan nila kamo nga dili Kana ingon niana, nan ang inyong pastor adunay grabe nga kaso sa espirituwal nga amnesia. Dili niya makaplagan ang iyang kaugalingon nga maila kauban nianang Iglesia; nga dili organisasyon; usa ka Iglesia, usa ka mistikal nga Lawas ni Cristo.

¹⁷⁶ Karon ania ang Espiritu Santo. Ania Siya aron buhaton ang eksaktong gisaad Niya nga pagabuhaton. Karon samtang ania kamo nga nakaduko ang inyong mga ulo, padayon lang mo sa pag-ampo. Tugoti nga manulti ang Balaang Espiritu, Mismo. Ug tan-awa kung kining. . . Nasayod niana ang si kinsa man, ang saad, kung unsa kini para niini nga panahon. Karon kamong mga nagkinahanglan, niining gabhiona, kamo, daghan kaninyo ang nagpataas sa inyong mga kamot. Sa dili pa ninyo buhaton kana. . .

¹⁷⁷ Nahunahuna ko, samtang ania kita dinhi ug mag-ampo gayud para sa mga may sakit, mahimo n’yo ba kaha nga mopahilayo gikan nianang dili-pagtoo, nianang denominasyon, nianang kredo nga nagasulti kaninyo nga dili ingon niana kining mga butanga, nianang usa nga nagasulti kaninyo nga Kini iya kono sa yawa. Pag buhaton nila ang ingon-ana, “Sila dili na gayud pagapasayloon, bisan niining panahona o sa umalabot pa nga panahon.” Unsa kaha kung Kini mao mismo ang Kamatuoran? Palandunga lang, unsa kaha kung Kini mao gayud, kung ingon-ana asa man kamo? Kita n’yo, dili n’yo kini kinahanglang isulti; toohi lang ninyo kini diha sa inyong kasingkasing. Ug aduna ma’y mga tawo dinhi nga nagatoo niana. Ania ako dinhi, sulod sa miaging duha na ka gabii, nagapamuhat ilalum sa usa ka butang, basta na lang, grabe, ginapugngan ug ginapaak ko ang akong dila, aron dili ko kini masulti mismo.

¹⁷⁸ Ug hinumdumi, higala, kini’y tali na kanimo ug sa Dios. Unsa kaha kung sayup kana, ug ginahunahuna mo kana? Nasayod ka na kung unsa ang mahitabo, dili ka na gayud pagapasayloon tungod niana. Espirituwal nga amnesia, diritso ka na nga mopaingon sa imong Eternal nga kamatayon, ang dili-pagtoo. “Ang wala nagatoo nahinukman na sa silot!”

¹⁷⁹ Karon mag-ampo mo para sa inyong sakit, og moingon, “Ginoong Jesus, nagsaad Ka. Ako. . .”

Tingali’g may pipila ka mga estranyo dinhi, nga wala pa sukad nakaanhi dinhi kaniadto.

¹⁸⁰ Nagsaad si Jesus, “Sama sa nahitabo kaniadto,” mokuha ako og usa ka Kasulatan, “sa mga adlaw ni Lot,” sa dihang ang Dios napadayag diha sa lawas nga unod; ug ang mga tawo, si Abraham, ang pinili nga pundok, ang pundok nga tinawag-

pagawas. Ug ang ngalan nga Abram giusab ngadto sa Abraham, pagkahuman nakita niya ang Pulong nga nahimong unod, ug naila Niini ang mga hunahuna nga anaa sa kasingkasing ni Sarah.

¹⁸¹ Ug sa dihang miabot ang Harianong Binhi ni Abraham, ingon niadto ang Iyang gibuhat, ug gitawag nila Siya nga “usa ka yawa.”

¹⁸² Giingon Niya, “Buena sa diha nga moabot ang Espiritu Santo, pagabuhaton ang mao gihapong butang.” Miingon, “Karon aduna pa’y kapasayloan sa dihang tawgon n’yo Ako nga ingon-ana, apan, pag mosulti kamo nga batok sa Espiritu Santo, wala na’y kapasayloan.”

¹⁸³ Karon hinaut nga Siya, diha sa Iyang Gahum, mokunsad niining mga tawo nga mananambong, kung asa man kamo, ug pinaagi sa Iyang espirituwal nga pagpang-ila ipakita nga Siya mao ang Pulong. Aron nga kung aduna man dinhi og nagaantus sa sakit nga amnesia, nga sila dili . . . wala na gyu’y ikarason, sa dili pa pagahimoon kining pagtawag sa altar.

¹⁸⁴ Hinaut nga magatabang ang Ginoong Dios. Karon samtang nakaduko ang inyong mga ulo, og nagaampo nga matinahuron gayud.

¹⁸⁵ Kita n’yo, aniyay usa ka gining nga nagalingkod dinhi sa atubangan ko. Gipataas niya ang iyang mga kamot nganha sa iyang nawong. Nagaantus siya sa usa ka kahimtang sa dugokan. Ug aduna pud siya’y nerbiyos. Aduna siya’y sakit sa tiyan. Ug nagalingkod siya dinhi sa akong atubangan karon. Ug aron masayran niya, dili siya taga dinhi niini nga probinsya. Gikan siya sa usa ka siyudad nga gitawag og Macon. Oo. Nagatoo ka ba nga mahimong isulti kanako sa Dios kung kinsa ka? Ikaw si Miss Ayers. Kung husto kana, ipataas ang imong kamot. Usa ako ka estranyo kanimo. Tinuod kana, dili ba? Karon wala na ang imong sakit. Si Jesus Cristo; gihikap mo ang Iyang bisti. Giayo ka na Niya. Karon toohi lamang kini.

¹⁸⁶ May usa ka lalaki nga nagalingkod diha sa may luyo sa bilding. Ginatinguha niya ang bautismo sa Espiritu Santo. Ginatinguha Niya ang bautismo sa Espiritu. Ania siya nagatindog sa atubangan ko. Dili usab siya taga, dinhi. Siya’y taga Carolina, Charlotte. Lepoe ang iyang ngalan. Tumoo ka sa tibuok mong kasingkasing, ug pagapun-on ka sa Dios sa Espiritu Santo, akong—akong igsoon, kung toohan mo kini.

¹⁸⁷ Dinhi, dapit sa akong tuo, aniyay usa—usa ka lalaki ug ang iyang asawa nagalingkod dinhi mismo diritso sa atubangan ko. Usa kini ka tigulang nga magtiayon, nganhi sa akong tuo. Nagaantus ang babaye sa usa ka kahimtang sa colon. Ang iyang bana aduna pu’y sakit sa kasingkasing. Dili sila taga dinhi. Taga Tennessee sila. Mr. ug Mrs. Thomas, kung motoo kamo sa tibuok ninyong kasingkasing, ipataas ang inyong mga kamot

ug mahimo n'yo nang dawaton ang inyong kaayohan. Giayo na kamo ni Jesus Cristo. Eksaktong ingon niana ang gisaad Niya nga buhaton. Pero wala ko pa nakita sukad-sukad ang maong mga tawo sa tibuok kong kinabuhi.

Espirituwal nga amnesya!

¹⁸⁸ Miingon si Jesus, “Ang mga buhat nga Akong ginabuhath pagabuhaton usab ninyo. Sa diriyut lamang panahon, ug ang kalibutan dili na makakita Kanako; apan kamo makakita Kanako, kay Ako,” personal nga puli-ngalan, “magauban kaninyo, bisan sa sulod ninyo, hangtud sa katapusan sa kalibutan.” “Si Jesus Cristo mao sa gihapon kagahapon, karon, ug hangtud sa kahangturan.”

¹⁸⁹ Karon, sa mga kalalaken-an ug mga kababayen-an nga ania dinhi, nga aduna gayu'y kung unsa man nga problema kaninyo, nga dili lang ninyo makita kung unsaon. . . . Kamo, gusto n'yo nga motoo, pero dili lang gyud kamo makasulod niini, ug gusto ninyo nga maiampo, ginatinguha ninyo nga dawaton Siya samtang ania kamo sa Iyang Presensiya, mahimo ba kamong moduol ug motindog dinhi mismo tupad nako, mag-ampo ako ug magpandong og mga kamot nganha kaninyo. Kung moduol kamo dinhi mismo karon, kamong nagaantus nga ingon niana, tungod sa espirituwal nga amnesya, ug gusto nga maiampo, aron mahimo na kamong gawasnon niana. Kung dili kamo usa ka—dili usa ka magtotoo, pero nagatinguha nga maiampo, duol mo dinhi ug motindog. Panalanginan ka sa Dios, batan-ong lalaki. Aduna pa ba'y moduol? Panalanginan ka sa Dios, gining. Duol ngari. Panalanginan ka sa Dios, batan-ong babaye. Aduna pa ba'y moduol? Dumuol kamo, og motindog dinhi mismo, karon na.

¹⁹⁰ Espirituwal nga amnesya, ayaw ko gayud nga matakboyan niana. Dili unta itugot sa Dios. Itugot nga ako—itugot nga mamatay ako tungod sa usa—tungod sa bisan unsa man, apan dili gyud unta itugot nga mamatay ako ingon nga usa ka dili-magtotoo.

¹⁹¹ Dumuol kamo, dawata n'yo Siya karon. Mahimo n'yo ba? Duol na, ug kanaug na mo dinha sa balkonahe, mga higala. Pipila lamang ka tikang panaug dinhi, ug mahimong magkahulogan na kini sa kalahian tali sa kamatayon ug Kinabuhi, para kaninyo.

¹⁹² Tan-awa, dili ko mahimong pabuhaton si Cristo og bisan unsa. Dili kinahanglan ni Cristo nga mobuhath og unsa mang butang gawas sa usa ra ka butang: kinahanglan Niyang tumanon ang Iyang Pulong. Kinahanglan Niyang buhaton kana aron mahimo nga Cristo, mahimo nga Dios. Kinahanglan Niyang tumanon ang Iyang Pulong.

¹⁹³ Karon hinumdumi, kung dili kamo sigurado sa inyong kasinatian, nganong dili man mo moduol nganhi karon. Kung nahisakop lang kamo sa usa ka denominasyon, kung usa kamo ka apo nga Pentecostal, tungod ang Dios wala ma'y mga apo.

Aduna Siya'y mga anak nga lalaki ug mga anak nga babaye, pero walay mga apo nga lalaki ug mga apo nga babaye. Kita n'yo? Walay ingon niana ang Dios. Aduna lamang Siya'y mga anak nga lalaki ug mga anak nga babaye, ug nasayod kamo nga dili kamo ingon niana.

¹⁹⁴ Tingali'g nakasulti na kamo og laing mga pinulongan, tingali'g nakasayaw na kamo, tingali'g nabuhat n'yo na ang tanan *niini*. Okey lang kana. Wala ko'y unsa man nga batok niana. Apan kung aduna sa gihapon kamo nianang espirituwal nga amnesia, kanaug na kamo dinha, ug moduol dinhi ug motindog dinhi. Mag-ampo kita bahin niini. Unsa ma'y masulti ninyo? Miyembro sa iglesia, usa lang ka—usa ka miyembro sa iglesia nga sa ngalan lang, nganong dili man mo mangduol dinhi ug wagtangan na nato kini karon mismo?

¹⁹⁵ Dili ko gusto nga mobiya dinhi sa Birmingham, ug nasayod nga sa umaabot nga adlaw, pag moabot na ang Paghukom, ug gikinahanglan kong mobarug nianang panahona sa inyong atubangan. . . Hinumdumi, matagbo ko kamo pag-usab. Kung dili ko na kamo matagbo dinhi sa ingon niini, o matagbo ko kamo didto na sa Paghukom ug kinahanglan kong panubagon kung unsa ma'y gisulti ko karong gabhiona.

¹⁹⁶ Karon paminaw mo. Maghinulsol kamo, mga higala! Maghinulsol, og panggawas na mo gikan niana. Panggawas na mo dinha. Duol na mo karon.

¹⁹⁷ Angay gyud nga ang matag babaye nga mubo ang buhok sa niini nga probinsya, o niini nga lugar, moduol na dinhi karon. Eksakto gayud. Nga, ingon nga wala kamo'y igong grasya para mosulti gayud, “Ako—ako—ako—gusto ko, gusto ko na nga pataason ang akong buhok, Igsoong Branham.” Angay gyud. . . “Kinahanglan kong. . . Bueno, pero wala man ko'y kaisog para buhaton kini.”

Aba, moingon mo, “Aduna ba gyud kana'y unsa man nga kahilambigitan niini?”

¹⁹⁸ Dinhi dili pa lang dugay, may usa ka ilado nga ministro ang miduol sa ako, ug miingon, “Gusto kong pandongan ka og mga kamot, Igsoong Branham.” Miingon, “Ginaila man ka sa tanan ingon nga usa ka propeta.”

Ingon ko, “Wala baya ko nagsulti sukad-sukad nga usa ako ka propeta.”

¹⁹⁹ Ingon siya, “Pero ginaila man ka sa mga tawo nga ingon niana. Pirmi mong ginawatas-watas silang mga kababayen-an, tungod sa pagsul-ob og purol,” ug—ug, oh, usa siya ka tawong Pentecostal. Ug miingon, “Tungod sa pagsul-ob og purol, ug pagpaputol sa ilang buhok, ug mga ingon nianang butang.” Ingon pa, “Dili mo na kana buluhaton.”

Ingon ko, “Kang kinsa diay kana nga buluhaton kung ingon-ana?”

²⁰⁰ Ug miingon siya, “Sila nga mga tawo, nganong dili mo man tudloan silang mga kababayen-an kung unsaon mamahimong, magkaaduna og mahimayaong espirituwal nga mga gasa, ug tabangan ang mga tawo, imbis nga paningkamotang...” Miingon, “Ginaila ka baya nila. Kung unsay isulti mo kanila, toohan ka nila.” Miingon, “Nganong dili mo man sila sultihan kung unsaon pagdawat sa mahimayaon nga mga gasa ug tabangan ang mga tawo, imbis nga kondenahon sila pirmi?”

²⁰¹ Ingon ko, “Unsaon ko man pagtudlo kanila og algebra nga ayaw man gani nila nga makakat-on sa ilang ABC?” Kita n’yo? Kita n’yo?

²⁰² Kinahanglan n’yong magsugod sa pinakaubos, paghinulsol o mangalaglag kamo! Karon bahala na kamo, paghinulsol o mangalaglag kamo! Bug-os gayud nga gipaila na ni Jesus Cristo ang Iyang Kaugalingon dinhi, matag gabii. Ug kini mao ang gabii nga nagapahinungod kita alang niini nga kaluwasan. Pipila lang man ka tikang pasaka dinhi, ug daghan pa ko’y oras para maghulat.

²⁰³ Hinumdumi, Birmingham, wala sa ako ang inyong dugo. Inosente ako. Ug kung anaa gayud kaninyo ang Balaang Espiritu, aduna kamo og kahigayonan nga moduol na karon. Ug kung nagaantus kamo tungod sa kung unsa nga matang sa iglesianismo nga naghinungdan kaninyo nga magkaaduna og espirituwal nga amnesya, nganong dili man kamo mangduol? Si Jesus man mao ang tambal. Mahimo ba kamong moduol?

²⁰⁴ Karon pipila na ka tawo ang mihawa sa balkonahe. Nagahulat ko nga makita kung asa na sila, kon mogawas ba o moduol nganhi sa altar. Kining mga ania dinhi sa ubos, duol na mo dinha sa palibot. Husto. Kamong mga ania dinhi, tindog mo diha sa palibot sa altar, og moingon, “Tapos na ko niini.” Oo, panaug na sila, ang duha ka gining. Maayo kana.

²⁰⁵ Dumuol na kamo karon. Pipila lang man ka tikang gikan dinha. Ug kana nga mga tikang mahimo nang magkahulogan og kalahian.

²⁰⁶ Karon, tan-aw mo, aduna ko’y gustong ipangutana kaninyo. Unsa kaha kung moabot Siya karong gabhiona? “Oh,” moingon mo, “dili Siya moabot.” Wala ko kahibalo kung moabot ba Siya o dili. Pero kini mao na ang kaulahiing ilhanan. Hinumdumi n’yo, MAO KINI ANG GINAINGON SA GINOO! Nadungog na ba ko ninyo nga nagsulti niini nga mao gayud ang tinuod? Nakita n’yo na ang kaulahiing ilhanan para kaninyo. Kana’y sumala sa Kasulatan. Nakita n’yo na ang kaulahiing ilhanan para kaninyo, Pentecostal. Ayaw kamo’g kalibog karon sa kung unsa ang Iyang gisaad sa Israel pagmahuman ang Pagsakgaw; dili kamo kadto. Tapos na kamo, nianang panahona. Kita n’yo? Karon na ang

panahon ninyo. Karon na ang ilhanan nga para sa inyo. Karon na ang inyong oras. Mao nga ayaw n'yo Kini isalikway. Ayaw n'yo buhata kana. Mas maayo nga moduol na kamo. Nagatoo ba mo kanako ingon nga alagad sa Dios? Hinumdumi.

²⁰⁷ Birmingham, wala pa ko nakatagbo og labaw ka buotan nga mga tawo. Kamo ang pinakabuotan nga mga tawo nga gusto kong mahimamat sa kinabuhi ko, apan gikinahanglan ninyo ang usa ka rebaybal. Naghimalatyon kamo. Nagkaaduna na kamo og espirituwal nga amnesya. Naghimalatyon na kamo. Ayaw n'yo buhata kana. Dasiga n'yo pag-usab kung unsa ang anaa na sa inyo. Buhia n'yo kini pag-usab, sa gilayon, sa dili pa moabot si Jesus.

²⁰⁸ Sige, samtang sila'y. . . Padayon lang sa pagduol. Pasagdi lang sila nga padayong mangduol hangtud nga makuha nato ang tanan, nga ginatawag sa Ginoo, dinhi. Umari na kamo karon.

²⁰⁹ Hinginli n'yo kanang amnesya. Ania man karon ang gamhanang Mananambal aron ayohon kana, og wagtangon kana sa inyo. Gipamatud-an na Niya nga ania Siya. Pila man ang moila niana, pinaagi sa pagpataas sa inyong kamot, moingon, "Nagatoo gayud ako niini; nga miingon Siya nga buhaton Niya kini"? Kita n'yo? Karon ania Siya mismo. Kita n'yo? Kita n'yo? Tumoo kamo.

²¹⁰ Ug pila man ang nasayod nga ginasulti ko kaninyo ang kamatuoran, nga naghimalatyon kamo ug nagkinahanglan og usa ka rebaybal? Kita n'yo? Kamatuoran kini.

²¹¹ Mga maayong tawo kamo. Wala ka na'y makaplagan nga labaw pa. Wala na'y mas maayo sa pitik sa mga kasingkasing, kaysa anaa ilalum niining mga sinina sa mga taga-Habagatan nga ania dinhi. Husto kana, tinuod gyud nga mga tawo! Apan, mga igsoon, mas maayo nga mahigmata na kamo, sa gilayon! Tungod sa takna nga wala ninyo damha, mahimong mahitabo kini. Mahimong dili kini mahitabo; wala ako masayod.

²¹² Apan, timan-i n'yo, nadawat n'yo na ang kaulahiang pasidaan kaninyo, busa kalagiw na mo samtang may panahon pa sa pagkalagiw. Dumuol na mo karon. Samtang nagapangduol sila, padayon ra kong maghulat, tungod kay mahimong adunay. . . Ang usa ka kalag nagkantidad og napulo ka libong kalibutan. Ug samtang makumbinsi ang mga tawo. . .

²¹³ Buot kong makita kini nga mahimong usa ka daku gayud nga rebaybal nga magaplastar sa matag iglesia dinhi sa palibot; kung tapuson na ninyo ang inyong mga panagkalahi ug isalikway na ang tanang pagkahakog, ug dawaton ang Espiritu Santo. Ginapamahayag ninyo nga nagatoo kamo Niini. Ginapamahayag n'yo nga nagatoo kamo Niini, ug, sa dihang miabot Kini aron ipaila ang Kaugalingon Niini, dayon nagabulag-bulag hinoon kamo sa usa'g usa. Nganong dili man nato hiusahon ang atong mga kasingkasing sa Pulong sa Dios ug toohan ang Kamatuoran?

Ingon niana unta. Padayon lang kamo nga maghimalatyon, nga maghimalatyon, ug mopaingon na mismo kamo sa Laodicea. Eksakto gayud sa kung unsay gisaad Niya, mamahimong ingon niana Kini. Mahimo ba nga moduol na mo karon? Karon na ang adlaw. Karon na ang nahimut-ang tuig. Matikdi n'yo kung unsa ang pagabuhaton sa Balaang Espiritu.

²¹⁴ Karon buot ko nga maania dinhi ang tanang mga ministro, nga nagakahingawa sa niini nga mga tawo, ari kamo og mag-ampo uban kanako, usab. Duol mo ngari, tanan nga mga ministro nga nagakahingawa sa niini nga mga tawo. Duol mo, duol lang mo dinha sa palibot, ug moduol sa taliwala sa mga tawo, ang ministro o usa ka personal nga magbubuhat, usa ka maayong personal nga magbubuhat, kababayan-an nga gustong motindog kauban niini nga mga kababayan-an karon. Toohan ko gayud, sa tibuok kong kasingkasing, nga mokunsad ang Espiritu Santo dinhi niini mismo nga dapit karon ug ipaila gayud ang Iyang Kaugalingon sa taliwala sa tanan niini nga mga tawo.

²¹⁵ Karon tudloan ko kini nga mga tawo dinhi, una. Karon, mga higala, kung para sa unsa man nga ania kamo dinhi, Siya ang nasayod. Ug mapamatud-an ko kini kaninyo, kuhaon Niini, ang tagsa-tagsa, dalhon kamo dinhi niini nga entablado, ug walay ni usa ka butang nga dili Niya ipahayag. Bueno kana'y sukad niadtong usa pa ako ka gamay'ng batang lalaki. Wala gyu'y pagduhaduha niana nga gasa. Apan ang pangutana, mahimo n'yo ba kining dawaton? Nagatoo ba mo niini? Karon ania Siya. Bueno, kung ania man Siya, nan adunay usa lang ka butang, ginatuman Niya ang Iyang Pulong. Kung ingon-ana toohi lamang nga madawat ninyo kini, ug dawaton kini, ug motindog ug moingon, "Ginoong Dios, ania ako aron dawaton kini," ug magpabilin lang dinha hangtud nga mahitabo kana.

²¹⁶ Sama sa giingon ni Buddy Robinson usa niadto ka higayon, sa kamaisan. Ingon siya, "Ginoong, kung dili Nimo ihatag kanako ang Espiritu Santo, sa pagbalik Nimo makakaplag Ka og naka-kamada na nga mga bukog nga napahimutang dinhi mismo." Sinsero gayud siya. Ug dili kamo makadawat og bisan unsa gikan sa Dios hangtud nga mamahimo una kamo nga desperado gayud.

²¹⁷ Karon, namatikdan ba ninyo ang mga tanum karon, namatikdan ba ninyo kung unsa ang atong ginabuhat? Kita, sa tinuod lang, aduna na kita'y igo nga Dios nganhi kanato hangtud nga miduol kita dinhi sa entablado, miingon ta, "Oo, mas maayo siguro kon moduol na ko." Bueno pangtibuok-kalibutan kini nga kasinatian. "Oo, mas maayo kon moduol na ako ug motindog." Moingon, "Bueno, bueno, wala ako mahibalo. Ania ako, kita n'yo." Hum! Daw sa unsa gayud nga punto! Wala na'y kalayo nga nagadilaab. Walay kadasig. Walay usa ka "sumulod ka Niini!" Ug, ingon nga usa ka ebangelista, masakitan kaayo ako nga

makita ang mga tawo sa Dios sa ingon niana nga kahimtang. Angay man gud nga magadilaab gyud kita.

218 Apan, nakita n'yo, unsa man kana? Tukma gayud sa akong gikasulti kaninyo. Pinadayag 3, “Dagaang ikaw. Ug,” miingon Siya, “tungod kay dagaang man ikaw, kung ingon-ana isuka Ko ikaw gikan sa Akong baba.” Husto ba? Mao kana’y Iyang giingon. Ug, kung gisulti Niya kana, nan mao kana ang Iyang pagabuhaton. Busa dili unta kita mamahimong ingon niana nga mga tawo.

219 Ania kamo, nga nagkinahanglan. Angkonon na nato Kini, o mamatay na, dinhi mismo. Husto. Angkonon na nato Kini, o mamatay na.

220 Karon, minahal kong igsoong lalaki, igsoong babaye, kung makanaug lang ako ug matabangan kamo nga mobuhat og usa ka butang, buhaton ko gayud kana. Karon, pinaagi sa usa ka gasa, masulti ko kaninyo kung para sa unsa nga ania kamo dinhi. Masulti ko kaninyo kung unsa, pinaagi sa Espiritu Santo, pinaagi sa Espiritu sa Dios, masulti kaninyo kung para sa unsa nga mianhi kamo, kung unsa ang nabuhat ninyo, kung unsa ang umalabot, o mora’g ingon niana; pero dili kana ang magsulbad niini. Gikinahanglan gyud ninyong dawaton Kini, kamo mismo. Gikinahanglan nga kamo gayud!

221 Karon andam na ba kamo? Ipataas ang inyong kamot, og moingon, “Andam na ako. Andam na ako nga mamatay dinhi mismo.” Karon ayaw n’yo buhata kini gawas kon sinsero gyud kamo niini. “Andam na ako nga mamatay dinhi mismo, o madawat ang ginatinguha ko gikan sa Dios.” Amen. Andam na ba gayud kamo?

222 Kung ingon-ana manindog ang mga mananambong, sa kon asa man. Karon magkauban, magkauban, hiusahon nato ang atong mga kaugalingon. Mag-ampo kita. Ug kita gayu’y... Kamong mga ministro duol na mo karon sa niini nga mga tawo dinhi, ang matag usa, ug ginarepresentar ninyo karon ang mga kamot ni Cristo.

223 Kamo nga nagatinguha sa Balaang Espiritu, kamo nga nagatinguha niana nga kasinatian, dili nga usa ka kadasig sa emosyon; kondili ginatinguha ninyo ang Espiritu Santo, ang Kinabuhi, ang binhi sa Kinabuhi sa kinasuloran ninyo. Ug gusto na gyud ninyong mawagtang kanang amnesia nga nagapahimo kaninyo—kaninyo nga dili na makaila sa inyong kaugalingon; wala na kamo kahibalo kung asa kamo; wala na kamo kahibalo kung unsa kamo; hinginlan na nato kini mismo karon! Adunay bag-ong Pagkahimugso dinhi alang kaninyo, usa ka tinuod, matuod nga bag-ong Pagkahimugso.

224 Karon ipandong nato ang atong mga kamot nganhi niini nga mga tawo. Atong, matag usa sa ato, ipataas ang atong mga kamot ug mag-ampo nga nagkahiusa.

²²⁵ Langitnong Amahan, sa Ngalan ni Ginoong Jesus, itugot, Ginoo, nga sa Ngalan ni Jesus Cristo, nga ang Espiritu Santo mokunsad karong gabhiona, niining Sabado sa gabii, diin mikunsad kaniadto ang Espiritu Santo sama sa usa ka nagahaguros nga makusog nga hangin. Hinaut nga mabautismohan kini nga mga tawo ngadto sa Espiritu Santo. Hinaut nga dili mobiya kanila ang Kalayo ug Gahum sa Dios. Kung ania pa sila inig ka buntag, hinaut nga magpabilin sila, magpabilin hangtud nga mokunsad ang Espiritu Santo.

²²⁶ Mao kana ang atong gikinahanglan! Mao gyud kana! Mao na Kini. Mao kana ang Espiritu Santo nga nagakunsad. (Nabuhat ko na kini. Nasayod ako niana.)

Kana lang. Toohi n'yo Kini karon! Dawata n'yo Kini! Magpapuno sa Iyang mga panalangin. 🕊

64-0411 Espirituwal Nga Amnesya
National Guard Armory
Birmingham, Alabama U.S.A.

CEBUANO

©2024 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org